



**Lukim moa  
poto long 2015  
Pasifik Gem i  
pas - 8 na 21**

**MIPELA KAM GUT YA!** Tim PNG hoki wet i kam namba tu long Pasifik Gems long pilai hoki. Ol i amamas wantaim silva medol bilong ol. Ol tu bai kisim K10,000 i kam long Gavman. Praim Minista tu i tok wan wan long ol narapela pilai manmeri husat i no kisim medol bai kisim K2,500 i kam long gavman. *Poto Nicky Bernard.*

# Papagraun laikim LNG mani

**TUPELA biknem papagraun bilong PNG LNG Projek i singaut long gavman long stretim ol papagraun wantaim ekwiti na royalti mani bilong ol.**

Simon Ekanda, husat i wampela biknem papagraun insait long Hides Ges projek eria i singautim Dipatmen ov Petroleum na Eneji long hariapim ol pepa wok we dipatmen i bin mekim long painimaut ol tru tru papagraun bilong PNG LNG Projek.

"Dipatmen ov Petroleum na Eneji i mas pinisim wok painimaut hariap long larim mipela i kisim royalti mani bilong mipela," Mista Ekanda i tok.

Bihain long ExxonMobil i salim moa long 100 LNG kago, ol papagraun i wet yet long kisim mani we ol inap long kisim long-pela taim pinis.

**I go moa long pes 2**

**Talk more for  
just K1 a day**

Subscribe to our K7 weekly pass.  
Dial **\*123\*7#**.

Contact us now!

Customer Care 76003555  
support@bmobile.com.pg

www.bmobile.com.pg





# Wol Trefiking De bai kamap neks wik

**PAPUA Niugini Nesanel Human Trefiking Komiti (NHTC) wantaim US Embasi Amerikan Kona i bai selebretim Wol De Egen-sim Trefiking long neks wik.**

Dispela de i kamap long mekim awenes long ol pipel husat ol i salim ol long kisim mani na long stopim dispela pasin na lukautim rait bilong ol pipel.

Planti bilong ol pipel

husat i save bungim dispela hevi em ol meri na ol pikinini. Ol meri na ol pikinini i save kamap olsem samting nating o olsem samting bilong baim na salim na bihain ol i save yusim ol long mekim ol bikpela wok.

Long wankain taim, Dipatmen bilong Atoni Jenerel na Intenesenel Ogenaisesen bilong Maignresen bai mekim ol pre-

sentesen bilong ol na soim ol sotpela piksa na tu bai i gat taim bilong askim ol kwesten long save moa long human trefiking.

Long 2013, UN Jenerel Asembli i bin makim July 30 olsem Wol De egensim Trefiking long ol manmeri.

Dispela long luksave long rait bilong ol pipel long wanem kain pasin i kamap long olgeta hap long wol.

## PM singaut long Tores Stret boda rivi

PRAIM Minista Peter O'Neill i tok gavman bai stretim toktok wantaim Australia long larim ol manmeri i stap klostu long Tores Stret boda i ken kisim bek sampela graun bilong ol.

O'Neill i tok gavman bai makim sampela ol bikman long go pas long stretim toktok wantaim Australia long givim bek sampela graun bilong ol manmeri long Westen Provins.

"Taim Australia i bin makim boda mak bilong en wantaim PNG long 1975, em i bin kisim sampela graun bilong ol manmeri long Westen, husat i nau kamap manmeri bilong PNG," Mista O'Neill i tok.

O'Neill i tok dispela i bin mekim na sampela hap ailan graun na solwara we ol manmeri Westen i save mekim gaden, painim apus na hukum

pis long solwara i bin kamap olsem ples bilong Australia.

"Bihain long 40 yias, dispela gavman i bin skelim olsem em ino stret. Olsem na mipela i laik stretim toktok wantaim Australia long larim ol manmeri long Wtsen i kisim bek sampela raits bilong ol long go painim pis, mekim gaden or usim graun bilong tumbuna bilong ol we nau i stap aninit long Australia," O'Neill i tok.

O'Neill i tok kliarim tok olsem ol tru tru papagraun bilong sampela ol ailan, graun na solwara nau i stap aninit long Australia em ol ol samting bilong ol tumbuna bilong ol manmeri Westen Provins.

Tasol taim PNG i bin kisim independens long yia 1975, gavman bilong Australia na PNG i no bin katim dispela boda bilong tupela kantri gut.

Australia i bin kisim sampela graun bilong PNG long dispela taim na fotipela krismas i go pinis na ol dispela bus, graun na wara i nau stap olsem ples blong Australia maski ol tumbuna bilong manmeri Westen i bin yusim olsem graun bilong ol.

"Ol pipel bilong yumi bai nau kisim bek bus, graun na wara bilong ol tumbuna bilong ol. Mipela bai stretim toktok wantaim Australia long larim Australia i wanbel na givim bek sampela raits long ol manmeri long yusim bus, graun na wara," O'Neill i tok.

O'Neill i askim ol manmeri husat i stap klostu long Tores Stret ailan na ol Westen manmeri husat i stap klostu long solwara long Tores Stret long wok bung wantaim gavman long stretim dispela toktok.

## Hailans Haiwe bai gat sek poin long nait

**Esther Bralyn Wani i raitim**

OLGETA nait ol bas i save lusim Lae na Madang long go antap long Hailans Haiwe. Dispela ol i save kolim *tulait tulait* we ol draiva i no save slip long nait bikos ol i save draiv long nait.

Dispela i save kamap long taim yet na ol polis i bin stopim taim planti kar i save kapsait bikos draiva i save slip na ol sampela pasindia i save kisim bagarap na dai, tasol ol i save bikhet na raun tulait tulait yet.

Wanpela bilong ol draiva, Ivan Pima, husat i bin save draiv long Hailan Haiwe pastaim i tok em i no save pilim ai slip taim em i no slip olsem 3-pela de long wanem ai bilong em i save hat long pas.

Em i tok em i ken draiv long nait bikos em bin draiv long taim yet na no gat wanpela hevi bin kamap long han bilong em yet tasol ol yangpela draiva mas slip long nait bipo ol i raun tulait tulait.

Long wankain taim, polis komanda suprintenden bilong Simbu, Albert Beli i tok

bai gat sek poin long boda bilong Simbu na lsten Hailans.

Dispela bai ol i stopim ol bas i ran tulait tulait we ol i ken kam slip long hap na lusim hap long 5 klok long moning na pinisim ran bilong ol i go long Hagen na go het.

Dispela wari i kamap taim ol i lukim planti rot eksiden i kamap na ol stil pasin tu i go bikpela.

Ol draiva i no save slip gut na klostu long tulait long Simbu na Jiwaka hap ol i save kapsaitim kar.

## Tenyu long gutpela Pasifik Gems ...Amamas na yuniti bilong ol wansolwara

TAIM Bikpela amamas na tok tenkyu i go long kantri na ol lida, ol pilaia na ol ogenaia long gutpela namba 15 Pasifik Gems pilai i bin kamap long Mosbi, tok i go aut tu long pablik long lukautim gut ol fasiliti o ol spot veniu o ples ol pilai i bin kamap long ol long ol lain i kam long bihain taim i ken yusim tu.

Dispela em ol bikpela stedium we i kostim planti milien kina olsem Sir John Guise Stadium, Sir Hubert Murray Stadium, Taurama Akwatik Senta, Bisini, Caritas Teknikel na Sekonderi skul jim na tu, bikpela Gems Viles insait long Yunivesiti bilong PNG hap.

Jenerel Seketeri bilong Konprens bilong ol Katolik Bisop, Pater Victor Roche SVD i makim maus bilong ol bisop na Katolik Sios i wokim ol toktok bihain tasol gem i bin pinis long las wik Sarere.

Opisel klosing bilong dispela bikpela rijinol pilai i bin kamap long las wiken Sarere long Sir John Guise Stadium, Pot Mosbi.

Ples i bin pulap no gut tru na i no gat spes bilong sindaun tu.

Pater Victor i tok "mi tok amamas long ol ogenaia bilong Pasifik Gems

long gutpela wok ol i mekim.

"Mi laik tok tenkyu tu long Paim Minista, Spot Minista, NCD Gavana na ol geta lain i bin wok long dispela Gems na tu, ol planti volantia husat i bin wok hat tru long givim sevis bilong ol.

"Moa yet tu, mi tok amamas long tim i kamap ol wina bilong dispela bikpela pilai, em Tim PNG na ol spot manmeri long wokim rekot na winim planti medol bilong kantri," Pater Victor i tok.

Em i tok amamas long ol pipel bilong Mosbi siti na PNG long go insait gut long ol gem long sait bilong lukim na sapotim ol pilaia, maski ol i bilong wanem kantri, soim gutpela pasin na mekim gut we i no bin lukim ol trabel o bikhet pasin i kamap.

"Tupela wik bilong pilai i bin lukim amamas pasin na selebresen.

"Yumi i bin amamas, yunait na ol 24 kantri bilong "wansolwara" i bin yunait long kalsa na pilai na amamas.

"Yumi tok tenkyu long Bikpela long mekim dispela pilaia i ran, go het na pinis gut.

"Nau yumi askim ol pipel long lukautim gut ol fasiliti.

## Papagraun i laikim LNG mani

*I kam long pes 1...*

Taim ol narapela projek patna bilong dispela K43 bilan kina PNG LNG Projek i kisim pinis ekwiti na royalti mani, ol papagraun i wet yet bikos ExxonMobil na gavman i painimaut olsem planti 'giaman papagraun' tu i pulap i stap long stilim mani bilong ol tru tru papagraun.

Mista Ekanda nau i salensim gavman long tokim ol papagraun long wanem as stret gavman na ExxonMobil i no bin painimaut gut ol tru tru papagraun bipo long larem projek i go het.

"Gavman inap long painimaut gut pastaim ol tru tru papagraun bilong dispela bikpela ges projek. Mipela i les long gavman long paulim mipela gen. Gavman i mas givim mani bilong mipela," Mista Ekanda i tok.

Narapela biknem papagraun Albert Mokai, i tok gavman i mas stretim ol papagraun hariap long larim dispela bikpela ges projek i go het gut.

"Mipela i laik wok bung wantaim Gavman na projek divelopa ExxonMobil. Mipela i les long pasim o stopim projek. Tasol mipela laikim Gavman long stretim mipela hariap," Mista Mokai i tok.

Mista Mokai em i bipo primia bilong Sauten Hailans Provinsel Asembli. Em i wanpela pa-

pagraun husat i laikim gutpela developmen long kamap long projek eria na tu, em i laikim ol pipel tu long kisim gutpela benefit o gutpela samting bilong LNG.

"Mi les long larim ol papagraun manmeri i stopim projek. Projek i mas go het gut. Long larim ol pipel i amamas, gavman i no ken paulim ol. Peim royalti mani bilong ol pipel na larim ol tu i amamas," Mista Mokai i tok.

Las wik na narapela wik i go pinis, ol papagraun long Hides na Kutubu i bin protes o i no wanbel na ting ting long pasim LNG Projek. Ol ai witnes i tok moa long 300 manmeri i bin protes long Hides 4 long askim Gavman long peim aut mani royalti mani bilong ol.

"Ol manmeri i bin kamapim wanpela protes long Hides 4 tupela wik i go pinis. Ol i tok as tru bilong dispela protes em long larim gavman i luksave long ol olsem wanpela namba wan patna tu long dispela ges projek na tu, gavman i mas peim ol tu," Jose Mora, wanpela wokman long Hides 4 i tok.

ExxonMobil i tok ekwiti na royalti mani bilong ol papagraun i stap gut long wanpela tras akaun wantaim Sentral Benk (Benk ov Papua Niugini).

ExxonMobil i tok em i wok bilong gavman long painimaut gut ol tru tru papagraun bi-



**Fig 702 long Welpad 702 long Hides 4, PNG LNG Project. Piksa i kam long ExxonMobil PNG.**

long LNG Projek bipo long larim ol i kisim ekwiti na royalti mani bilong ol.

ExxonMobil i tok olgeta mani bilong ol papagraun i stap gut insait long PNG long dispela tras akaun na ol papagraun bai kisim mani taim Dipatmen ov Petroleum na Eneji i pinisim ol wok painimaut.

Dispela wok painimaut em i ol i kolim klen vetin proses (CVP). Wanpela wokman bilong Dipatmen ov Petroleum na Eneji i tokim *Wan-*

*tok Niuspepa* olsem klostu taim tasol ol bai pinisim gut stret olgeta wok painimaut.

"Mipela i pinisim olgeta wok tasol ol sampela papagraun i no wanbel long dispela wok painimaut na ol i toktok planti gen.

Sampela papagraun i laik kotim Gavman gen na dispela i wok long holim bek ol samting we mipela inap long pinisim long taim yet," em i tok.



# PNG ken holim ol arapela bikpela bung

**PRAIM Minista Peter O'Neill i amamas tru long PNG i holim na pinisim gut stret Namba 15 Pasifik Gems.**

PM O'Neill i gat bikpela bilip olsem PNG i ken holim ol arapela bikpela bung wankain olsem Pasifik Gems.

Sampela bikpela intanesenel kibung PNG bai holim long ol yia i kam bihain emi Pasifik Ailans Forum (PIF) lidas mitin, FIFA Wimens Anda-20 Wol Kap, na APEC Miting long 2018.

"Mi gat bikpela bilip olsem PNG i ken holim gut ol arapela bikpela kibung tu. Mipela i soim Pasifik na wol tu olsem mipela i ken holim ol kain bikpela bung," PM O'Neill i tok.

Gavana Jeneral Sir Michael Ogio i tok PNG i ken holim kain ol bikpela bung bikos yumi i gat ol samting long kamapim gut ol bung.

"Yumi gat ol bikpela stedium na ol arapela wol klas fesiliti o ol samting bilong kamapim gut ol bikpela kibung. Yumi mas amamas long yumi bin soim gut ol kain kain kalsa na pasin tumbuna bilong yumi long dispela taim long XV Pasifik Gems," Gren Sif Ogio i tok.

Em i tok tenkyu long ol manmeri long soim pasin poroman na gutpela samting ol i bin mekim tai mol arapela pilai manmeri bilong Pasifik i bin kam pilai long Pasifik Gems .

"Yumi mas sanap wantim na mekim samting we ol arapela manmeri i ting mipela i no inap long mekim. Sapos yumi sanap wantim, strongim tingting na mekim samting, tru tumas bai yumi mekim gut," Gavana Jeneral i tok.

NCD Gavana Powes Parkop i amamas tru olsem ol pipel bilong Pot Mosbi siti i bin stap isi stret na harim toktok bilong polis na soim gutpela pasin poroman long ol arapela manmeri bilong Pasifik.

"Mipela i mekim samting we ol arapela manmeri i no bin ting mipela inap long mekim. Pasifik Gems i bin ron gut tru stret. Wankain olsem tasol, mipela i ken holim ol arapela bikpela kibung tu. Husat tok nogat, yumi ken holim nab a yumi traim holim 2026 Komonwelt Gems," Parkop i tok.

Spot Minista Justin Tkatchenko i amamas tru olsem PNG i bin soim gutpela kala na pasin poroman long taim bilog ol gems.

Em i amamas long ol manmeri i bin bihainim loa na soim pasin rispek long ol ausait manmeri husat i bin kam pilai o lukim Pasifik Gems.

"Mi laik tok tenkyu long ol pilai manmeri bilong yumi i bin pilai gut tru stret na kisim planti gol medal. Ol arapela manmeri husat i no bin pilai tu ol i bin stap isi na lukim gems long wei bilong soim pasin rispek na pasin poroman. Mi amamas stret long dispela gutpela pasin mipela i bin soim long ol ausait manmeri," Tkatchenko i tok.

## Ol lida i kisim salens

OL nesanel politikel lida na ol menesa bilong pablik na praivet sekta institusen i kisim salens long givim gutpela lidasip na gutpela pasin na gutpela lo sapos Papua Niugini bai go het long lukim gutpela developmen.

Nesanel Plening na Monitoring Minista, Charles Abel, i mekim dispela toktok long tupela lidasip samit i kamap long Kokopo long Is Nu Briten.

Dispela bung i kamap long mekim kamap ol lida i gat laik o wanpela tingting long olgeta hap long kantri long mekim ol narapela pipel long karim aut wok.

Em i kamap olsem bung hap bilong ol lida long ol bikpela sekta bai ken mekim ol gutpela senis long ol bikpela hap bilong ol ajenda long developmen bilong gavman.

Bikpela toktok long dispela bung i bin kamap long implementesen bilong gavman we i opim developmen prinisipel bilong risponsibel sastenebel o StaRs.

Ol bikman i bin stap insait long dispela bung em, Spika bilong Palamen, Theodore Zurenouc, Minista bilong Haia Edukesen na Risets Sains na Teknologi, Malakai Tabar, Gavana bilong Isten Hailan, Julie Soso, memba bilong Usino Bundi, Anton Yagama na memba bilong Kundiawa-Gembolg, Tobias Kulang.

Long wankain taim, Gavana bilong Is Nu Briten, Ereman ToBaining Junior i tok provinsel gavman bilong em i wok strong long sapatim ol pablik seven na ol bos bilong dipatmen long putim pefomens mesemen stended long ol kontrak.



Ol etlit bilong Tonga i mekim danis long soim amamas bilong ol long kisim plak bilong Pasifik Gems long go pas long holim narapela gems long 4-pela yia bihain. Foto: Nicky Bernard.

# GAME ON!

Ryan Pini is always busy competing or training, so he uses **BSP's Online Banking and Visa Debit Card** to transact anytime or anywhere.

Ryan Pini, MBE - PNG Swimming Champion and BSP Brand Ambassador

**Schedule Future Payments** via Internet Banking to pay for rent and cable TV so you don't miss any of the special Games moments.

**Make Online Payments** while at work, at home or travelling overseas.

**View Statements Online** to track your transaction history.

**Access Your Own Funds** at over a million VISA points worldwide wherever a VISA logo is displayed.



**Be up to speed, stay in the lead like Ryan.**

**SIGN UP NOW!**

320 1212 / 7030 1212 - 24/7  
 servicebsp@bsp.com.pg  
 www.bsp.com.pg





**RIVIU BILONG DISPELA WIK**

**Meri Dokta i dai taim kar kapsait – USA**

WANPELA biknem meri antropolojjs long kantri i dai long dispela wik. Dokta Sullivan bilong Papua Niugini i dai taim hevi i kamap long kar long rot long Nu Yok, long Yunaitet Stet bilong Amerika. Dokta Nancy Sullivan i save stadi long ol kalsa olsem antropolojjs na em i save stap long Madang. Minista bilong Foren Afes na Imaigresen, Rimbink Pato, i tok olsem dokta meri i dai long Fonde nait. Em i tok sori long ol famili bilong dokta.

**Harim toksave long taim nogut long solwara – Milen Be**

PLANTI hevi i wok long kamap long solwara long wanem ol pipel i no harim ol toksave bihain long go aut long solwara. Dispela i mekim ol atoriti long Milen Be long toksave long husat i gat bot long lukaut pastaim long taim nogut bihain long go aut bikos planti dai i kamap na planti i lus. Gavana Titua Philemon i tokim ol pipel long bihainim toktok na lukaut long laip bilong ol yet bihain long em i sori long sampela i dai long wankain hevi.

**Ol pipel i painim sevis go na i lus long solwara - Madang**

OLSEM 15-pela pipel long Long Ailan i go long Etep Helt Senta long Morobe provins long kisim marasin tasol ol i no bin go bek long ples olsem wanpela wik nau. Ol atoriti long disasta rilif long Madang i ting olsem ol dispela pipel mas i dai long wanem nogat wanpela sain bilong ol. I gat olsem wanpela wokman tasol long Long Ailan, Mathew Salung, husat i save yusim mani bilong em yet long salim ol sik pipel i go long Etep long kisim marasin. Em i lukim olsem ol pipel i no kam bek na em i go long Madang na toksave long Disasta Rilif Atoriti long Madang.

**Tupela man i kukim Baibel long pablik – Hagen**

TUPELA man long Hagen, Westen Hailan provins, Wasi Kunjil na Israel Keen, i kukim Baibel long ai bilong olgeta pipel long long las wik Fraide. Tupela i mekim dispela long soim olsem baibel i mas stap pinis long bel bilong ol pipel na em i nogat wok bilong em nau. Tupela tok em i buk nating. Laki bilong tupela polis i kam na kisim tupela bipo long ol pipel i paitim tupela.

# PNG bai holim fores ministas bung

**FORES Minista Douglas Tomuriesa i tok PNG bai holim wanpela bikpela kibung bilong bungim ol arapela minista bilong fores long 21 kantri olgeta.**

Dispela kibung em i namba tri Esia Pasifik Ikonmik Kopresen o APEC ministeriel miting we PNG bai holim long Oktoba 27-29, 2015 long Pot Mosbi.

Minista Tomuriesa i tok dispela kibung em i wanpela namba wan kibung long bungim tingting bilong ol Fores Minista insait long 21

APEC memba kantri.

Em i tok dispela miting bai helpim PNG gavman long stretim ol arapela wok bilong holim bikpela APEC 2018 miting.

“PNG i save salim diwai na ol arapela samting i kam long diwai. Ikonmik bilong PNG i save kisim mani long diwai na tu diwai em i namba wan samting long laip bilong ol man,”Tomuriesa i tok.

Em i tok PNG em i wanpela kantri insait long wol we em i save salim ol samting i kam long diwai, na tu PNG i

gat bikpela bus we planti diwai tru i pulap long en.

“Pasin bilong lukautim ol bus na diwai em i wanpela namba wan samting dispela kibung bai toktok long en. Hamas mani diwai na ol bus samting i save givim long sapotim ikonmik na gavman tu em i narapela samting we dispela kibung bai toktok long en,”em i tok.

Dispela bung tu bai strongim sapot bilong PNG i go long APEC na dispela miting tu bai soim olsem PNG em i redi long bungim

olgeta 21 lida bilong ol APEC kantri bihain king tripela krisimas.

“Ol arapela fores minista tu bai kam tokim mipela long sampela gutpela samting ol bin mekim long lukautim bus o fores bilong ol. PNG i ken lainim planti gutpela samting long ol arapela fores minista husat bai kam long dispela bung,” Tomuriesa i tok.

PNG Fores Atoriti (PNGFA) wantem PNG APEC 2018 Kodinesen Atoriti i wok bung wantaim long kamapim dispela bikpela bung.

## Wok bung long redi long ol disasta bai kamap

OL hevi i save kamap long Rabaul long Is Nu Briten olsem volkeno o maunten paia i wok long stap long tingting bilong ol pipel yet na ol i save tingim taim ol i lukluk i go long Simpson Harbour na lukim smuk i kamap yet long maunten Tavurvur.

Long dispela U.S Nevi, Royel Australia Nevi, na ol save man bilong bekim tok long ol disasta bilong PNG i wok bung long Julai 9 antap long haus sik sip USNS Mercy long karim aut trening na mekim ol toktok long redim Rabaul long ol hevi o disasta bai kamap bihain.

Mercy i kam sua long nambis bi-

long Rabaul long namba tu misen stop bilong Pasifik Patnasip 2015, em bikpela anuel muliletrel long helpim ol manmeri na redim ol long ol hevi bai kamap long Indo-Esia-Pasifik rijon.

“Mipela i toktok long stat na wok long wanpela disasta plen. Mipela i mekim wanpela volkeno wankain long dispela i bin kamap long PNG long 1994, toktok long wanem taim em i bin kamap, na wanem kain bagarap em bin kamapim. Mipela i lusim long ol rot ol bai mekim long kain volkeno olsem,” Komanda Lisa Kelty i tok.

As bilong ol dispela toktok em

long mekim wanpela disasta menesmen plen long rijon long wok long en.

“Mipela i mekim wanpela hap we em i luk olsem i tru na bilong dispela hap stret, long Rabaul bikos ol i bin lukim pinis liap volkeno,” Komanda Darren Delany bilong Royel Australia Nevi i tok.

Komanda Delany i tok em i gutpela sans bilong ol pipel long hap long tokaut long ol rot ol i lukim long menesim kontrolim disasta, ol rot we bai em i kamap bihain taim na ol rot long stat wok bung.



**GUTPELA WOK: Ol disaplin fos olsem Ami, Polis na Woda manmeri i bin mekim bikpela wok long taim bilong Pasifik Gems. Ol dispela ami man em ol lain bilong karim ol medol na pleg long taim bilong medol seremoni. Poto Nicky Bernard.**

# Madang Gavana i les long salim dai bodi go

**GAVANA bilong Madang, Jim Kas i gat wari long pasin bilong karim ol bodi bilong dai man long go bek long asples long wanem, planti mani i lus long dispela rot.**

Em i tok, dispela em i wanpela bikpela hevi ol i save bungim long Madang.

Em i tok planti mani bilong edministresen bilong provinsal sevis impruvmen (PSIP na provinsal sapot gren (PSG) em ol i bin yusim long helpim ol famili bilong ol lain i dai long karim bodi go long planti long ples stret. Ol i yusim mani long baim balus, kar na spit bot o dingi long kisim bodi go.

“Mi wari long dispela bikos yumi no ken westim mani long dispela kain rot. Yumi mas lain long tok no gat o traim long painim sampela we long helpim o em i mas stap insait long Fainensol instraksen o Edministretiv Gaidlain long mekim wok isi long yumi,” Mista Kas i tok.

Mista Kas i mekim dispela toktok long taim em i bin givim ol ripot bilong 2014 PSIP akwiital i go long Di-

patmen bilong Implementesen na Rurel Dvelopmen long Pot Mosbi dispela wik.

“Taim wanpela man i dai, ol lain bilong en bai go lukim opis bilong memba na LLG Presiden.

Sapos ol i lukim LLG Presiden i no helpim ol, orait ol i save go lukim open memba na sapos MP i no stap orait ol i save kam na lukim mi bikos mi save stap long provins olgeta taim na karim hevi bilong salim ol dai bodi go long ol ples bilong ol long olgeta hap bilong Madang Provins na mi save pilim hevi long dispela,” Mista Kas i tok.

Em i tok nesanel gavman long save na tingting bilong kankain kalsa bilong Papua Niugini i mas mekim sampela kain rot long salim ol bodi i go long ples na em i no ken kamap hevi long edministresen bilong distrik, LLG na provins.

Gavana Kas i tok ol mani bilong (PSIP/PSG) em gavman i givim bilong developmen long kamapim gutpela laip long ol rurel komyuniti.



**Gavana bilong Madang, Jim Kas ii givim PSIP/PSG ripot bilong em i go long Ekting Seketeri bilong Dipatmen bilong Rurel Implementesen, Paul Sa’l long Pot Mosbi.**

## Egrikalsa sekta nidim gavman sapot

**Stanley Nondol i raitim**

Bikpela lukluk bilong gavman nau em long ol mineral sekta olsem oil, ges, gol na kopa tasol ol dispela risos bai pinis wanpela taim na agrikalsa bai stap yet long sapotim ol pipel.

Gavman imas givim bikpela luksave long egrikalsa sekta na putim bikpela mani long sapotim ol fama bikos planti pipel i kisim sapot long egrikalsa long sapotim laip bilong famili.

Long dispela yia i lukim prais bilong ges long wol maket i pun-daun bikpela tru na Minista bilong Treseri, Patrick Pruaitch i tokim palamen olsem kantri i no gat mani long yusim long ol developmen we gavman i tokaut long K16 bilien baset bilong 2015.

Dairekta bilong institut bilong Nesanel Afeas, Paul Barker i tok egrikalsa i sapotim bikpela milien populesen na gavman i mas putim bikpela mani long baset long stretim ol sevis olsem rot, bris na ol arapela long helpim ol fama.

Mista Barker i tok bikpela lukluk bilong gavman i stap long oil, ges, gol na kopa tasol em i tok egrikalsa i sapotim bikpela populesen na i ken kisim bikpela winmani i kam long ol planti yia.

Ol sapot gavman bai givim em olsem stretim ol rot long ol ples long distrik long ol famai ken yusim gutpela rot long go salim ol gaden kaikai na ol kes krop long maket.

Taim rot i gutpela kos bilong PMV bai kam daun.

Kos bilong PMV long ol viles i go long taun na ol bikpela maket i dia bikos rot i nogut, bris i bagarap. Ol PMV i save les long go ranim sevis bikos rot i bagarap na ol i pret long kar bilong ol bai bagarap. Taim wanpela PMV go em i sasim bikpela mani long ol pipel long PMV fe.

“Ol fama long viles i no nidim 4 len haiwe rot wantaim strit lait. Ol i no nidim ovahet bris o flai ova bris long go long taun o maket. Ol i nidim gutpela rot. Ol rot stap pinis long en gavman i mas pytim mani na stretim long ol kari bai go long ples na helpim ol fama”Mista Barker i tok.

Gavman i bin tokim ol pipel panti taim olsem em bai kisim mani long ol maining, na petroleum sekta na sapotim egrikalsa sekta long

baset. Tasol long 2015 baset gavman i no tok kliia long wanem egrikalsa projek o wanem rot gavman i putim mani long sapotim egrikalsa long sapotim laip bilong ol rurel fama.

Gavman i no putim mani long kirapim ol kopi plantesen na ol kopi fama. Planti kopi blok i wok long dai na bikpela pret stap olsem dispela kes krop bai klostu taim i dai.

Ripot i tok PNG kopi long wol maket ipun-daun. Na i no salim inap kopi long wol maket. Ol arapela kes krop olsem kopra na kakao tu i no kisim inap sapot long apim prodaksen.

Taim gol, kopa, oil, ges na mineral i pinis ol egrikalsa krop olsem kopi na kopra bai stap yet wantaim ol pipel.

Em bai nonap pinis.

## Stilman nonap long stilim diwai



**Bikpela bus i karamapim bikpela hap bilong PNG. PNGFA i lukautim olgeta bus insait long kantri.**

BUS em i wanpela namba wan samting long laip bilong ol manmeri long PNG bikos em i save larim ol manmeri i kisim planti samting.

Ol manmeri i save painim pisin na kapul na ol arapela apus long bus. Ol i save kisim diwai long mekim haus, olsem paiawut, na mekim planti ol arapela samting tu.

Tasol taim waitman i bin kam insait long katri, ol i wok long katim diwai na bagarapim bus. Ol login kampani tu wok long bagarapim bus, wara na graun long planti hap long PNG.

Tasol nau PNG Fores Atoriti (PNGFA) i kamapim planti gutpela samting long stopim ol man o kampani long stilim diwai o katim diwai nating nating. Olsem na nau yet stilman ino inap long stilim diwai insait long kantri.

Fores Minista Douglas Tomuriesa i tok PNGFA i gat ol samting long yusim long abrusim ol man o kampani long stilim ol diwai na samting bilong ol bus.

“Gavman bilong Japan aninit long JICA i bin halivim mipela long lukautim ol bus bilong PNG. Nogat wanpela man o login kampani bai stilim ol diwai long bus,”Tomuriesa i tok.

JICA i wok long helpim PNGFA wantem setalait long glasim ol stil pasin i kamap long login kemp. Dispela nupela sistem bilong JICA i mekim na nau planti ol foren login

kampani i no moa stilim diwai insiat long kantri.

Em tok long mun Oktoba dispela yia, 21 fores minista i kam long ol APEC memba kantri bai bung long Pot Mosbi long stretim sampela toktok long kamapim gut ol bus na diwai insait long Esia-Pasifik rijen.

“PNG bai lainim planti gutpela samting long ekspirens bilong ol arapela kantri. Mipela bai holim dispela bung long hia na mi save dispela bung bai soim wol olsem PNG i gat bikpela bus na planti diwai,”Tomuriesa i tok.

Planti ol login kampani bilong Saina na Malaisa i wok long katim diwai long kantri na salim i go bek long kantri bilong ol yet.

Moa long 20-pela login kampani i nau stap long PNG. Sampela ol i bin katim diwai longpela taim stret na nau ol i yusim mani bilong diwai long mekim kankain bisnis insait long kantri.

Sampela login kampani i kam insiat long kantri nau tasol na ol i wok long katim diwai nating nating long PNG na bagarapim bus, graun na wara.

Tasol PNGFA i tok loa bilong stilim diwai long busi stap pinis, na tu sapos loa i painim aut olsem login kampani i asua long bagarapim bus, graun na wara, dispela login kampani husat i asua bai kisim bikpela taim.



**God bilong Israel em i God bilong PNG...Dispela fail piksa i soim wanpela man i holim i go antap stret flek bilong Israel. Maski PNG i gat flek bilong en yet, dispela man i apim go antap flek bilong Israel. Piksa i soim ol manmeri i wetim Palamen Spika Theo Zurenuoc long kisim i kam long PNG long mun Epril 2015 wanpela King James Vesen Baibel we krismas bilong en i 404 yias. PNG i mekim God bilong Abram, Aisak na Jakob i kamap God bilong dispela kantri tu. Olsem na man long piksa i apim flek bilong Israel. Wantok Fail Piksa.**



# Singaut long gavman stretim kopi industri

**Stanley Nondol i raitim**

**KOPI em bikpela kes krop long Hailens rijon na sampela provins bilong nam-bis tasol ol kopi fama i no kisim sapot long gavman. Olsem na planti ol kopi plentesen na liklik blok i dai na planti fekre i no moa wok.**

Presiden bilong Setler na Fama Asosiesen, Wilson Thompson i tokim *Wantok Niuspepa* long dispela wik i tok bikpela populesen bilong hailens rijon i kisim bikpela sapot long kopi long sapotim ol yet tasol kopi i no gat sapot bilong gavman.

Mista Thompson i tok Minista bilong Egrikalsa Tommy Tomscoll na gavman i mas tok klia long pablik ol plen bilong gavman long kirapim kopi industri, Em i tok sapos gavman i no gat plen bai olsem wanem long ol liklik fama long ples.

Mista Thompson i tok planti ol bikpela kopi plentesen long hailens i lukim bus

i gro na ol fekre tu i no moa wok olsem bipo.

Em i tok Minista bilong Egrikalsa na Dipatmen bilong Agrikalsa i stat long givim kopi ekspoting laisens long wanwan distrik na long salim kopi long wol maket. Tasol ol fama bai kisim kopi olsem wanem na bungim mak bilong ekspot aninit long laisens.

Minista Tomscoll i bin tok kopi long kantri i bin kam daun long las 30 yia bikos planti ol plentesen na liklik kopi blok em bilong bipo na ol diwai go olpela pinis na i no karim planti pikinini.

Mista Tomscoll i tok em tru olsem gavman i no bin sapotim gut kopi industri long planti yia na sampela hevi i kamap long ol bikpela kamapni i gat ekspot laisens na lukim kopi i pundaun.

O'Neill gavman i wok long givim kopi ekspot laisens long sampela distrik na i tok olgeta distrik bai kisim laisens bilong ekspot.

Minista Tomscoll i tok

pastaim ol ausait kampani, ol i no ppa bilong kopi tasol ol save kamap olsem namel man na kisim ekspot laisens na salim kopi go aut na mekim bikpela winmani. Na ol kopi groa i kisim liklik mani.

Aniniit long lo bilong nupela ekspot laisens, husait kampani i laik kisim i mas gat kopi gade long mak bilong 10,000 hekta o moa.

Mista Tomscoll i tok em i moa gutpela long ol pipel i mas planti nupela kopi na pikim planti prut na salim bikpela long maket.

Mista Tomscoll i tok moa olsem gavman i stat long stretim dispela hevi na givim laisens em wanpela bilong rot long givim strong long ol kopi groa yet bai salim kopi. Em i rausim namel man, ol ausait kamapni.

Em i tok em aninit long nupela laisens, wanpela laisens holda i ken salim 3,000 kopi bek.

## Pasim Gems Seremoni stat wantaim bel hevi...



**Presiden bilong Pasifik Gems Asosiesen, Tonga Ledi Robyn Tu'ivakano i sanap long stes bihain long em i kisim pinis plak bilong Pasifik Gems long Presiden bilong Pasifik Gems Kaunsil, Vidhya Lakhan.**

**Frieda Sila Kana i raitim**

**TUPELA wik o 14 de**

long Pot Mosbi siti i lukim ol namba wan pilai spot man na meri o etlit bilong Saut Pasifik na PNG yet i kam bung na mekim siti i paia lait moa. Planti lain i go lukim gems long ol arena tasol planti moa i lukim tasol long ol televisen long haus bilong ol yet.

Tasol tupela bung we planti i no laik long abrusim em long openim na pasim seremoni. Ating opim seremoni i bin go gut tru olsem tingting bilong dispela raita. Mi bin go insait long openim gem long taim olsem 6:30 long apinun na mi no bin gat wanpela trabel long geit bilong go insait bikos mi gat pas olsem nius ripota na tu i no bin gat planti lain i pait long go insait.

Tasol long taim bilong pasim gem seremoni em i bin gat sampela hatwok i kamap we planti pipel na ol dai hat fen i no bin hamamas stret long sanap long bikpela lain kraut ausait long Sir John Guise stadium inap 3-pela aua samting. Dispela kain kraut i

stat yet long Daltron bas stop na i go isi, isi na i no gat gutpela tok-save long wanem as na dispela i kamap. Ol lain i sanap yet ausait long banis na seremoni stat pinis. Bihain tasol ol lain i painimaut olsem hap sait bilong stedium em ol i pasim bikos long ol paia wok bai kamap na tu ol i pasim bikpela geit long sait bilong Gordons.

Tasol ol kraut ino les, no gat, ol i go yet inap olgeta i go insait na sindaun na sanap nabaut long trek fil na arere long fil bikos ol wansait sit na ol gren sten i pulap pinis.

Wanpela samting we i bin go bagarap liklik long sait bilong ol sekyuriti long ol geit em ol i wok long pasim geit long ol man na meri na i no kea olsem ol mama na pikinini i wok long sanap long geit na ol i bamim nabaut ol taim ol i traim long pasim geit. Tasol olgeta dispela bel hevi na wari em i pinis taim ol lain i go insait na lukim planti gutpela samting i kamap.

Wanpela em taim ol Pasifik Gems i makim Ryan Pini, olsem namba wan etlit bilong Pasifik. Na tu bikpela

hamamas long ol sampela fevoret singa bilong PNG olsem Jamie Lee, Anslom, Oshen, Moses Tau, Sir George Telek, Paluai Sook Sook Garamut lain, na long wansolwara J Boog.

Pasim seremoni pinis wantaim bikpela paia wok we olgeta man, meri na pikinini i tanim na lukim kain kain stail i kamap.

Gavana Jeneral Gren Sif, Sir Michael Ogio i bin pasim dispela seremoni na PNG Presiden bilong Pasifik Gems Asosiesen long PNG, Sir John Dawanicura i givim bek Pasifik Gems plak i go bek long Presiden bilong Pasifik Gems Kaunsil, Vidhya Lakhan husat i givim i go long Pasifik Gems Asosiesen long Tonga, Ledi Robyn Tu'ivakano.

Ol ogenaisng komiti bilong XV Pasifik Gems i luksave long God husat i mekim olgeta samting i kamap gut em na ol makim Reveren Sir, Samson Lowa long beten na tok tenkyu long olgeta gutpela wok i kamap long dispela tupela wik.

Narapela Pasifik Gems bai kamap long Tonga long yia 2019.



### NOTICE TO ALL FUND RECEIPIENTS RE:INCOMPLETE AND NON ACQUITTALS 2012-2014

NGCB Audit investigation revealed that majority of the projects funded by Community Benefit Fund were either not acquitted at all or were only partly acquitted.

Fund recipients are only advising the Board by way of a written letter confirming receipt and monies expended as the expenditures instead of attaching the actual receipts as the usual practice to account for monies expended. Audit could not consider such letters as the actual acquittals and not acceptable.

In the absence of proper receipts this may indicate that some expenses could have been for personal use and abused by the fund recipients.

It is the responsibility of all fund recipients to provide an Acquittal Report for the use of public funds, demonstrating that the funding has been used for the purpose for which it was provided in compliance with accountability requirements.

#### Your Acquittal Report should entail the following:

- 1) Detail summary of financial break-up of how funds were expended,
- 2) Bank statements of organisations/groups
- 3) Copies of receipts
- 4) Pictures of the actual infrastructure, complete project and
- 5) Brief explanation on how your organisation, community and individuals have benefited this funding.

Audit managed to obtain those acquittals available from January 2012 to December 2014 thus all incomplete and non-acquitted from 2012, 2013 & 2014, must be submitted in full to the National Gaming Control Board by 31st August 2015, in a marked envelope and addressed to:

**Chairman  
Board of Trustees Community Benefit Fund  
National Gaming Control Board  
P.O. Box 759  
WAIGANI  
National Capital District**

**Note:** Failure to lodge your acquittal report may result in legal actions and NGCB not assisting with any future requests.

For further assistance contact our Community Benefit Fund unit on email address; [cbf.infor@ngcb.gov.pg](mailto:cbf.infor@ngcb.gov.pg) or phone no. 320 1907 or fax no. 320 1908.

**AUTHORISED BY: CHAIRMAN, LESLIE HOFFMAN**



# PNGNID projek rejistaim moa pipel long NCD

NESENEI Aidentiti Projek (PNG-NID) i kisim pinis moa long 36,000 pipel long rejista long PNGNID insait long Nesenel Kapital Distrik inap long de 20 bilong dispela mun.

Nesenel Statistisen, Roko Koloma i tok tenkyu long olgeta pipel bilong NCD husat i bin givim sapot bilong ol long go na putim nem bilong ol, pulimapim fom na kisim poto wantaim pinga prin insait long dispela tripela wik.

Namba bilong ol pipel i rejista long 9-pela zon em olsem; Gerehu kaunim 3911, Yunivesiti/Waigani 2542, Tokarara/Hohola 2356, Gordon/Saraga 4803, Boroko/Korobosea 4335, Kilakila/Kaugere 6826, Koki/Taun/Hanuabada 7016, Laloki/Napanapa 2353, Bomana 2012.

Long taim ripot i bin kamaut 10-pela de i go pinis, i bin gat 14,809 moa pipel i kamap long ol mobail unit na rejista.

“Mi askim ol pipel bilong NCD long kam long rejista olsem famili na mi amamas tu long wok bilong ol lain bilong mi long Nesenel Statistik Opis mobail tim husat i go long ol nainpela hap bilong NCD long wokim ol rejista,” Mista Koloma i tok.

“Na las tru, mi laik tok tenkyu long olgeta nius man na meri husat i mekim gutpela wok tru long givim



Zon 83 Gordons Saraga – ol lain bilong Erima setelmen i wet long rejista.

stori bilong dispela wok insait long Pot Mosbi, long 15 Pasifik Gems we nau tasol i pinis we planti bilong

mipela inap long ritim, harim na lukim long televisen. Larim kain gutpela wok bilong yupela i mas go

het!” em i tok. Bihain long wanpela mun, ol lain husat i wokim dispela hap bilong

kisim NID kat bai i ken go long Boroko na kisim ol NID kat bilong ol.



## Papua Niugini NESENEL AIDENTITI PROJEK



### Oi emu namo totona, Nesinol ID kadi oi abia



# Pasport

▶ Eda tano bada lalonai: Oi emu kad do oi ia durua bema oi ura gabu aida oi lao eda tanobada lalonai

▶ Tanobada Haida: Oi emu kad do oi ia durua bema oi ura paspot bona visa abia ma lao gabu haida oi itaia tanobada ta ta dekenai.

### “Oi rejista hari bona oi noho lalonai”

Nesenel Plening Dipatment  
ese hereva ia mailaia





# Madang laikim moa hai skul long distrik – Sariki

James G. Kila i raitim

**MADANG** i gat bikpela nid nau long sampela moa hai skul o sekenderi skul i mas kamap long ol distrik insait long ol provins bikos namba bilong ol sumatin i go antap tru.

Edukesen edvaisa na Siaman bilong Madang provinsel edukesen Bod (PEB), Moses Sariki i tokaut long dispela i no long taim i go pinis bihain long bikpela namba bilong gret 7 na 8 sumatin long ol praimer skul long provins bikos long tusen fi fri polisi bilong (TFF) Nesenel Gavman.

Mista Sariki i tok bikpela salens nau i stap long ol memba bilong palamen bilong Madang long wokim kamap dispela i kamap olsem han mak bilong ol.

Misa Sariki i askim ol skul bod siaman na ol het tisa bilong ol praimer skul long distrik long mekim ol submisen o askim i go long ol nesenel memba (MP) husat i makim ol distrik bilong ol long lukluk moa long dispela samting na helpim.

Em i tok planti ol skul i lukim bikpela namba bilong ol sumatin tru long wan wan klas. Sampela ol klas i gat moa long 50 sumatin em wanpela tisa tasol i lukautim, na dispela i no stret. Na i no bihainim Edukesen polisi long PNG na i kamapim hevi tu long ol tisa.

Insait long las 10-pela yia i go pinis, no gat wanpela nupela sekenderi skul em ol MP bilong Madang i kamapim long sapatim na helpim human risos developmen long Madang provins.

Wanpela papa, Johnson Maku bilong Josephstaal i tokaut olsem Madang provinsial gavman insait long las 10-pela krismas i



No gat ples long ol klasrum nau bikos namba bilong sumatin i go antap bikos long fri edukesen polisi bilong gavman. Foto: James G. Kila

no wokim kamap wanpela nupela sekenderi skul insait long Madang provins.

Mista Maku i tok misin tasol i go pas long wokim kamap ol sekenderi o hai skul long lukautim nid bilong ol praimer skul bilong en, tasol provinsial na nesenel gavman em nogat stret.

Em i salensim ol MP bilong Madang long

lukluk moa long edukesen na kamapim ol sekenderi skul olsem han-mak bilong ol taim ol i stap long Nesenel Palamen.

Long Madang provins ol sekenderi skul we gavman i kamapim em Tusbab na Karkar sekenderi tasol.

Ol skul we misin i go pas long kamapim em Malala, Brahman sekenderi (Katolik),

Raikos, Good Sheperd (ELC-PNG Luteran), Aiome Hai skul (Angliken) na Holi Spirit hai skul (Katolik).

Aiome hai skul i pas olgeta bihain long sampela ol sumatin i bin pait na kukim daun sains leb wantaim domitori o ples-slip bilong ol man sumatin.

What it means to be Papua New Guinean

**“Our home is one of the most unique countries on earth. We all have a part to play to make PNG the greatest country on earth.”**

Let us embrace our shared values as we build the nation we want - together!

© David Kirkland



**“PNG... EM MI YAH!”**

**National Strategy for Responsible Sustainable Development**  
www.PNGStaRS.org • Department of National Planning and Monitoring



# ExxonMobil PNG givim K54,800 long Kikori Distrik Haus sik

EXXONMOBIL PNG i givim K54,800 i go long Kikori Distrik Haus sik bilong sekim ol pipel long sik Tuberculosis (TB) na tu, long kamapim wok bilong luksave long dispela sik.

Mani bilong STOP TB kempein long Kikori-Galp Provins i gat 30 laip saket bilong ol helt wokman na meri long yusim taim ol i go long ol medikol patrol wantaim dingi long ol ples i stap longwe long taun, arere long Kikori Wara.

"Mipela i amamas long mekim wok wantaim Galp Kristen Sevis aninit long Kikori Distrik Haus sik long kamapim luksave bilong helt kea na long control bilong TB," Andrew Barry, Menesing Dairekta bilong ExxonMobil PNG i tok.

ExxonMobil PNG em i strongpela sapota bilong helt kea wok insait long ol hap ples we PNG LNG projek i gat wok i stap na em i save wok wantaim ol NGO, risets na helt kea institusen long lokol, provinsal na nesanel level.



ExxonMobil givim sek i go long Kikori Distrik haus sik.

# Nesanel Helt Dipatmen kisim nupela banis marasin bilong polio

**Frieda Sila Kana i raitim**

**NESENEL Dipatmen bilong Helt, Promosen na Edukesen opis i bin singaut long wanpela miting wantaim ol wok patna bilong ol long dispela wik bilong givim toksave bilong nupela marasin bilong banisim ol bebi long ol i no inap kisim sik polio.**

Johnny Arva bilong Nesanel EPI Yunit i bin wokim wanpela presentesen long nupela vaksin bilong banisim ol bebi na ol liklik pikinini long ol i no inap kisim sik polio long taim ol i liklik.

Helt Promosen na Edukesen Brens wantaim helpim bilong WHO media opisa i bin singautim ol patna husat i save helpim long givim ol

banis sut na marasin na tu ol midia husat i save helpim long autim toktok i go long ol pablik i ken kisim save, long tokaut olsem Ogas 12 bai ol i tokaut long dispela marasin i kamaut long PNG.

Wanpela o tupela keis i bin kamap wanpela mun i go pinis nau ol i wok long sekim long lukim ol banis marasin i kamap pinis o no gat long Sauten Hailans long strongim dispela tok.

Insait long PNG ol helt ripot i soim olsem 46 pesen bilong olgeta pikinini husa i stat long kisim banis marasin i no save kisim namba tri dos bilong Penta. Tasol i gat bikpela namba moa bilong ol pikinini husat i no save kamap long haus sik i stap na i no save kisim wanpela banis marasin.

Dispela banis marasin penta em bilong stopim sik polio we i save bagarapim bodi bilong ol pikinini na ol i save gat olsem han, bodi na lek i krungkut o i no kamap gut.

Ol helt atoriti nau i laikim moa toksave i mas go aut long komyuniti long skulim ol mama na ol famili long bikpela wok ol i gat long bringim ol bebi na ol liklik pikinini krismas 0 i go long 15 long kisim las banis marasin bilong Pent.

Menesa bilong Helt Promosen na Edukesen, Rose-lynn i tok bikpela gol o tingting bilong komyunikesen na sosel mobilaisesen em long mekim ol pipel long kam long kisim dispela marasin.

Ol i tok olsem i gat stori i stap pinis olsem i gat ol pikinini husat i kisim pinis

wanpela dos bilong Pent long maus tasol i no go long namba tri taim em kisim bagarap pinis.

Insait long namba wan 14 mun bilong wanpela bebi em i mas kisim banis marasin bilong polio, Pent, tripela taim bilong em i ken banisim em long ol kain sik i save kamap. Ripot bilong ol provins i givim aut banis marasin Pentavalent 3 em i olsem long yia 2014.

Hela provins i no bin vaksinetim 6,580 (81 pesen), Madang 11,688 (72 pesen), Wes Sepik Provins 5,511 (68 pesen), Galp 3,592 (68 pesen), Morobe 14,148 (65 pesen), Is Sepik Provins 9,148 (62 pesen), Enga Provins 8,503 (59 pesen), Sauten Hailans Provins 9,857 (58 pesen), Jiwaka



Bebi aninit long 14 mun i mas pinisim Pentavalen marasin tripela taim na bai em i no inap long kisim sik olsem polio.

*Poto: Helt promosen na edukesen yunit*

6,396 (52 pesen) na Westen Provins em 3,320 (51 pesen).

Tasol Menesa bilong Helt Promosen i tok dispela namba em bai i no trupela namba bikos planti mama i no save kisim ol pikinini i go kamap long ol helt haus sik

na etpos na klinik long ol ples. Long Ogas 12 bai gat bikpela lons bilong dispela program bilong toksave long olgeta pipel i mas luksave na kisim ol pikinini long pinisim olgeta banis marasin bilong ol taim ol i stap aninit long 14 mun yet.

## Digicel redi long patna wantaim helt promosen

**Frieda Sila Kana i raitim**

DIGICEL em i wanpela bilong ol lain patna bilong helt promosen na edukesen long mekim toksave bilong nupela banis marasin bilong polio we bai helt dipatmen i rolim aut long mun bihain.

Wanpela wokman bilong Digicel, Steve husat i bin stap long bung bilong ol patna long las wik Fraide i bin tok olsem wol i wok long senis na pasin bilong toktok wantaim ol pipel o kastoma tu i senis.

Digicel nau i stap long 31 kantri na i save mekim ol wok bilong awenes long ol kain kain bikpela toktok bilong kamapim gutpela sindaun.

"Ol pipel i save yusim ol mobail



Steve – makim Digicel long taim bilong miting bilong banis marasin bilong sik polio.

fon long salim SMS i go i kam. I gat 2.7 milien digicel fon nau ol pipel i wok long yusim long PNG. SMS em i gat pawa long kamapim senis.

Ating niuspepa bai ol i no ritim o TV bai ol i no lukim, tasol sapos ol i holim mobail fon na wanpela teks i kam insait, hariap tru bai ol i opim na lukim wanem toktok i stap insait," Steve i tok.

"Mipela save yusim ol sms long salim olgeta kain toktok we kastoma i laikim. So mi laik helpim tingting bilong yupela long tingim sms long bringim tok save bilong helt bilong ol pikinini i go long ol mama.

SMS i gat pawa long givim tok-save long ol kastoma," em i tok.

Helt Promosen na Edukesen dipatmen i laik askim tingting bilong ol patna olsem Digicel, Wol Visen, Sios bilong Jisas Krai long Leta De na ol narapela praivet kampani na ol midia.

Helt dipatmen i laikim planti tok save i mas go long ol mama na ol i no ken pret long go long haus sik, na klinik long kisim banis marasin na sut bilong pikinini.

Tasol sampela bilong ol patna i stap i tok, ol mama i save go long haus sik wantaim pikinini tasol sampela taim ol helt woka i save salim ol i go bek long sampela kain as olsem i no taim bilong klinik bilong banis sut na marasin o kain

samting olsem. Dispela bai mekim ol i les long go bek gen long narapela taim.

Tasol ol lain i makim maus bilong ol nes na ol helt wokman na meri i tok olsem nau yet, olgeta haus sik na klinik i sot tru long ol nes na ol helt woka olsem na planti taim ol i no inap long helpim olgeta lain.

Menesa bilong Helt Promosen, Mis Roselyn i tok, nau yet ol i wok long redim ol prin pepa bilong yusim long nesanel kempein stat long Ogas 12.

Em i tok olgeta lain husat i laikim givim helpim i ken toksave na mekim olsem long planti pipel i mas kisim gutpela toksave long bringim ol pikinini i go long haus sik long kisim banis marasin na sut na pinisim dos bilong ol.



# Naispela ples bilong ol meri malolo na kaikai

James G. Kila i raitim

MADANG taun i gat naispela ples arere long nam-bis we ol meri i ken go sindaun na malolo na amamasim belo kaikai bilong ol. Wangepela long ol dispela naispela ples em plawa gaden arere long rot i go long Madang Risot Hotel.

Dispela ples i gat naispela gras we ol meri i ken go sindaun na malolo gut stret long belo taim bihain long ol i baim ol kaikai long Kranget pis maket na, tu long liklik maket arere long raun-wara long Rotary Pak.

Sampela ol meri long Ramu NiCo i save laikim tru long go long belo taim long maket long Rotary Pak na baim ol kaikai na karim i go sindaun long gras na malolo gut stret na kaikai na tu pilim stret gutpela kolwin bilong solwara.

Long poto, ol meri husat i



save wok wantaim Ramu NiCo i sindaun malolo na amamasim tru long kaikai belo kaikai long Madang Risot gaden long Madang.

Ol stail meri bilong Ramu NiCo i amamas wantaim belo kaikai long plawa gaden long Madang Risot eria.

Poto: James G. Kila

# Kisim save long stadi bilong kain kain pipel

WANPELA save meri long stadi bilong ol kain kain pipel long wol, Dokta Paige West bilong Amerika em i kam pinis long Pot Mosbi na tumora em bai toktok long wok bilong em hia long Papua Niugini insait long Nesenel Laibreri long Waigani.

Dokta West bai givim tok-tok bilong em insait long Amerika kona bilong Nesenel Laibreri na em i fri long ol pablik long go na harim.

Dokta West em i wanpela Tow Asosiet Profesa bilong Entropoloji long Barnard Koles na Kolumbia Yuni-

vesiti long New York, Yuni-taitet Stets.

Em i bin stat wok wantaim fakalti long 2001, wanpela yia bihain tasol long em i kisim luksave pepa bilong em long Ph.D. long wok bilong kalsa na envairomen entropoloji. Jeneral risets bilong Dokta West em long laip na sindaun namel long sosaiti na envairomen bilong ol.

Go klostu moa long wok bilong em, Dokta Paige i raitim sampela pepa long wanem kain wok bung i stap namel long pasin bilong lukautim envairomen na intanesenel developmen.

Antap long pepa wok bilong em long Papua Niugini, Dokta West em i helpim long kirapim PNG Institut bilong Baiolojik Riset (IBR), em i wanpela liklik NGO we i save wok long kamapim ol rot bilong ol Papua Niugini saveman na meri long ol i ken kisim save long stadi na raitim ol toktok na stori bilong ol kain laip na sindaun bilong ol pipel na ples bilong ol.

Em i wanpela bilong ol bod ov dairekta na tu em i wanpela volantia entropolojijis bilong PNG NGO Ailan Aweanes (AA), wanpela solwara-konsevesen NGO.



Dokta Paige West



Yut, Meri na Famili  
Pastor  
Barbara Lunge

# Tok Promis, PNG em kantri bilong God

PAPUA Niugini nau i kamap Kavanen nesen o kantri bilong bihainim tok promis long wok aninit long God bilong Israel olsem God bilong kantri bilong yumi.

Ol ikonmik, politik na sosel sistem we ol man husat i no senisim tingting na pasin i wok long holim, em i wok long pundaun nau. Ol dispela sistem i stap aninit long liklik lain manmeri tasol na ol i bosim olgeta bikpela lain pipel na mekim planti i stap tarangu na i no gat mani na gutpela sindaun.

Dispela kain sistem i kamapim planti wari na kraik long bel bilong ol pipel na planti manmeri i kraik long God bilong ol. Nau God i harim kraik bilong ol pipel bilong em na em i laik givim dispela ol sistem i go long ol pipel bilong em. Long dispela as yumi ol kristen i mas redim yumi yet long kisim salens na tekova.

Kingdom bilong God i mas kam na bosim yumi long graun na stap oltaim, oltaim.

Sapos yu save na inap long mekim wanpela kain wok gut, em yu mas kirap na mekim wok bilong yu long inapim laik na tingting bilong God. Kisim ples bilong yu na bihainim plen bilong yu we taim mama i bin karim yu long mekim namel long ol wanlain bilong yu.

Kirap na soim lait long wanem hap yu stap long en!

I gat taim na ples bilong olgeta samting i save kamap aninit long heven. Tok stori bilong man i stap long graun long 400 yia i kam pinis nau. Nupela millennium i stat long wok nau aninit long kingdom bilong God.

Na olsem wanem long yu? Yu stap pinis long sip bilong Noah o no gat? Na olsem wanem long famili bilong yu, na provins bilong yu? Kisim olgeta i kam insait long sip bilong Noah o go singautim ol long kam insait nau!

Pinis.

**Toksave: Sapos yu i gat wari, tingting planti, yu mas ringim mi na bai mi helpim yu. Raitim pas long dispela adres na fon namba. Barbara Lunge, ROGIM, P.O. Box 3063. Boroko. NCD. PNG, o ring long 79638276 o salim email long: lungeb37@gmail.com**

# Ol Mama long WIB Ekspo i sapatim GBV

Rebecca Kuku long CIMC i raitim

OL Mama long Wimen in Bisnis (WIB) Ekspo i bung long sapatim paik egensim Jenda Bes Vailens (GBV).

Mama bilong wanpela stol o maket haus, Catherine Mondia i tok olsem mama ol i no laikim bihain bilong ol pikinini meri bilong ol wantaim Domestik Vailens o man bilong ol bai paitim ol.

"Em i gutpela ol ogenaisesen olsem Famili Seksuel Vailens na Vailens Eksen Komiti (FSVAC) na ol Meri Seif Haus i kamapim ol rot long helpim ol dispela meri husat i kisim hevi long GBV."

"Kalsa bilong yumi i mekim olsem em i orait long paitim meri, tasol wantaim ol awenes we FSVAC i karim aut, ol meri i kam aut na sanap strong na tok nogat.

Mipela olsem memba bilong WIB laik sanap tu na tok nogat long bihain bilong pikinini meri bilong yumi," Mondia i tok.

OL FSVAC tim i raun na lukim WIB Ekspo long taim bilong Pasifik Gems long mekim awenes long GBV.

Deputi Nesenel Program Kodineta bilong FSVAC, Enid Barlong, i tok olsem FSVAC i givim skul long GBV long helpim na toksave long ol pipel olsem GBV i wanpela hevi long kantri na em i kraitim o i brukim lo.

"Mipela i laikim olsem husat i kisim hevi long GBV na stap yet long save olsem i gat ol senta we ol i ken kisim helpim long dispela mipela i go het long mekim awenes long ol bikpela bung na long ol komyuniti," Barlong i tok.

Em i tok moa olsem infomesen i gat strong na FSVAC i laik toksave

Ol mama long Wimen in Bisnis Ekspo wantaim ol posta long GBV we FSVAC i givim aut las wik.



long ol pipel long GBV long daunim na rausim GBV.

"Mipela i mas senisim tingting na pasin bilong ol pipel long daunim GBV," Barlong i tok.





## Liklik pikinini

GUBA i stap wantaim papa mama bilong em long wanpela setelmen.

Papa bilong em i save kolektim tin na plastik botol olgeta de na salim.

Mama bilong em i salim aisblok long skul olgeta de.

Tupela i hat wok long painim mani bilong baim kaikai, skul fi bilong pikinini na narapela samting.

Vagi, em i tu stap wantaim papa mama bilong em long wankain taun. Tasol ol i stap long wanpela sabeb.

Haus bilong ol i gat tripela pluao. Papa bilong Vagi i wok long kampani bilong em yet. Ol i gat planti mani tru.

Guba na Vagi tupela i go long wankain praimer skul long taun bilong ol.

Olgeta de Vagi i save tok; "Setelmen mangi. No ken kamap klostu long mi. Mi les long smel no gut bilong yu".

Guba em man i no save mekim planti toktok.

Em i no mekim wanpela tok long bekim tok no gut bilong Vagi.

Em i daunim tasol. Em i sem, tasol em i daunim insait long bel bilong em.

Maski em i wanpela setelmen boi, tasol em i hat wok long stadi olsem na em i kisim ofa i go long hai skul.

Taim bilong greduesen, Guba na Vagi wantaim narapela pren bilong ol i kisim sertifiket na i go long hai skul. Tasol Vagi i no go long wankain hais skul olsem Guba na narapela pren bilong em.

Em i wanpela pikinini bilong man i gat planti mani, olsem na Vagi i go mekim haisku, sekenderi na yunivesiti stadi bilong em long ovasis.

Taim em i pinisim yunivesiti skul bilong em, Vagi i laik painim wok long narapela kantri tu. Tasol sik i kisim em. Olsem na em i kam bek long taun bilong em.

Long namba wan Sande, Vagi i joinim ol narapela manmeri bilong taun bilong em long Santu Misa. Taim Misa i stat na Pater wantaim ol ministran i wokabout i go long alta, Vagi i lukim pes bilong Pater na i tingting planti.

Long taim bilong lotu, em i lukim na glasim gutpela tru pes bilong Pater i sanap antap long alta.

Em i tok: "Dispela pes bilong Pater i no nupela long mi. i luk olsem mi bin bungim em long wanpela hap. Tasol wanem hap mi bin bungim em?"

Bihain long Misa, em i go painim Pater. Taim Pater i kamap klostu, Vagi i sekan na toksave long nem bilong em.

"Mi amamas long lukim yu Pater. Nem bilong mi Vagi. Mi bilong dispela peris. Tasol mi bin go stadi ovasis longpela taim pinis olsem na mi no bin bungim yu long hia. Tasol Pater, pes bilong yu i no nupela long mi. i luk olsem mi bin bungim yu bipo. Tasol long wanem hap mi bin bungim yu? Mi no klia nau."

Pater i lap tasol, bikos em i tingim gut yet. Man i toktok wantaim em nau em i Vagi, wanklas bilong em long praimer skul bipo. Olsem na em tok:

"Vagi! Yu lusim tingting long mi a?" Em i holim pasim Vagi tait tru na i tok; "Mi em i dispela smel no gut boi bilong setelmen ya! Mama bilong mi i save salim ais blok long skul bilong yumi.

Yu tu save long papa bilong mi. Em i save kolektim tin na plastik botol olgeta de. Mi, em Guba, yu save tokim em no ken kam klostu long yu long taim yumi stap long praimer skul ya?"

Vagi i sem no gut tru. Bikpela ai wara i pun-daun long ai bilong em.

Em i brukim skru na tok sori long Pater na askim Pater long pogivim pasin no gut em i bin mekim long en taim tupela i stap long praimer skul.

Na Pater Guba i holim pas Vagi tait moa moa yet na i tok: "God em i gutpela tru. Em inap givim taim long yumi long bungim narapela narapela gen".

# Bikpela rong long senisim Nesenel Entem

SENISIM ol toktok insait long Nesenel Entem long openim seremoni bilong Pasifik Gems em i rong na em i brukim lo aninit long Nesenel Aidentiti Ekt 1971, ol sios i tok olsem long dispela wik.

Wanpela toktok i kam long opis bilong Katolik Sios Seketeriet i tok olsem, sios i laikim ol lain husat i mekim dispela senis long givim tok klia long wanem as ol i mekim dispela senis na ol pipel bilong Papua Niugini bai save.

Opis bilong Seketeriet bilong Katolik Bisop Konprensi i tok, ol dispela toktok i stap long Nesenel Entem we i save tok tenkyu long God long gutpela pasin bilong em i no stap bikos ol lain husat i mekim senis i minim long rausim wantaim tingting no gut bilong "birua bilong God."

Papua Niugini em i wanpela Kristen Kantri na liklik lain tasol i laik wokim senis long daunim dispela Nesenel Aidentiti.



Ol yangpela i singim nesenel antem long openim seremoni bilong 2015 Pasifik Gems long Sarere 4 Julai long Sir John Guise Stadium, BSP arena long Pot Mosbi. Foto: Nicky Bernard.

"Mipela i laikim olsem olgeta taim, ol pipel i mas singim Nesenel Entem long namba wan

toktok i stap insait long en na dispela i mas kamap long taim bilong pasim seremoni bilong

Pasifik Gems," Pater Victor Roche, Seketeri bilong Katolik Bisop Konprensi i tok.

## Kristen krused long KBK kamap gut

SIOS em i namba wan samting long laip bilong yu wan wan manmeri, na edukesen na skul em namba tu samting, olsem na yupela i mas lukautim ol dispela samting.

Liesin opisa bilong Mineral Risoses Atoriti (MRA), Nicholas Waipuk i givim dispela toktok i no long taim i go pinis long wanpela sios krused long Enekuai long Kurumbukari maunten long Usinobundi distrik, Madang provins.

"Yupela i mas lukautim ol pikinini bilong yupela gut, ol skul na ol tisa bikos sampela long yupela bai amamas long bihain taim ol dispela pikinini

bilong yupela i kamap enjinia, pilot, menesa na bisnisan," Mista Waipuk i tok.

Dispela wanpela wik krused i bin kamap long Enekuai em Kurumbukari Spirituel Development Faundesin i go pas long redim.

Siaman bilong KSDF, Michael Yori i tok as tingting blong dispel krused em long senisim tingting bilong ol yangpela manmeri long Kurumbukari eria long ol i ken stap isi wantaim belisi na tu ol Kristen i ken beten na dediketim Ramu Nikel main i go long Papa God.

Moa long wan taunsen Kristen bilip manmeri i bin bung

long dispela krused long Enekuai.

Mista Yori i stori olsem long yia 1994 Propet Enock Takai i bin lukim wanpela visen long Maun Wilhelm long Gembogl long Simbu provins.

Long dispela visen, em i lukim wanpela pam stesen insait long wanpela wara na wanpela lait.

Long dispela wara em i lukim fleg bilong wanpela kantri bilong Esia na PNG fleg i kamaut.

Taim em i statim jenereta, em i lukim repela graun i kamaut na bihainim Ramu riva i go daun long nambis. Dispela

visen i kirapim tingting bilong em long kamapim krused long Enekuai namba wan taim long 2013.

Mista Waipuk i bin go wantaim Ramu NiCo KBK deputi main menesa, Timothy Irinaya long bung na lotu wantaim ol pipel long Enekuai.

Mista Irinaya i salensim ol pipel long senisim ol pasin bilong long lukim ol gutpela senis i kamap long laip bilong ol.

Ramu NiCo KBK menesmen i bin soim luksave bilong em long dispela krused na i givim kaikai em mani mak em moa long K3,400 na tu helpim wantaim fuel na trenspot .



Ol Kristen manmeri bilong Kurumbukari i stap long krused long Enekuai.



# PNG i win long spot na nau em i taim bilong winim ol arapela mak



**PNG i winim 88 gol medal na 217 medal na i winim namba 15 Pasifik Gems. Ol spot man na meri bilong PNG i soim olsem ol i nambawan.**

Ol pipel bilong PNG i amamas long ol i apim nem bilong kantri long pilai spot.

Yumi luksave tu long bikpela hatwok ol teknikel opisa bilong ol spot, ol volantia, sekyuriti, na ol ogenaisa bilong wan wan seksen bilong lukautim ol Pasifik Ailan kantri husat i bin kam stap insait long dispela bikpela gem.

Gavman tu i amamas na Praim Minista Peter O'Neill i tok tenkyu long ol na long ol pipel bilong kantri na moa yet long ol lain bilong Mosbi. Ol pipel bilong Mosbi i stap isi na i no kamapim trabel long dispela tupela wik bilong Pasifik Gems.

Ol pipel bilong arapela provins husat i bin kam long lukim ol pilai long Mosbi i bin amamas tu long lukim ol top spot man na meri bilong kantri na bilong ol arapela Pasifik kantri tu.

PNG i gat ol top ples bilong pilai spot na swim na ol arapela spot nau. I gutpela long yusim ol dispela ples bilong pilai long strongim spot insait long kantri.

Ol spotman na meri long ol narapela provins tu i mas gat sans long kam long Mosbi na yusim ol dispela fasiliti bikos bikpela mani bilong kantri i bin lus long sanapim ol dispela nupela ples bilong pilai.

Yumi amamas long apim nem long spot, orait nau em i taim bi-



long apim nem long ol arapela samting long kantri tu. Wanpela

bikpela salens tru em long kamap klostu long mak bilong Milenium

bilong mekim wok i strong long winim mak. I gat ol gutpela pro-

Developmen Gol. Yunaitet Nesen i bin putim dispela mak we ol kantri long wol i mas traim long winim bikos em i sut long ol samting i helpim sindaun na laip bilong ol pipel.

Edukesen, helt na klinpela wara, gutpela haus, helt bilong ol belmama na ol nupela bebi, em sampela bilong ol dispela samting.

Gavman i bin putim bikpela mani tru i go long spot long dispela yia, orait nau em i taim bilong skelim wankain mani olsem i go long stretim ol samting we bai helpim laip na sindaun bilong ol pipel nau na long taim bihain.

PNG i ken winim mak sapos yumi skelim gut mani long wan wan yia, na tu sapos ol lain

gram i stap pinis long strongim wok bilong edukesen na helt, tasol i no gat strongpela sapot na luksave long taim bilong skelim mani bilong baset. Dispela pasin i save mekim ol wokman i givap long wok.

I gat planti ol liklik gavman stesin long ol ples longwe long taun we i no gat gutpela sapot. Sampela stesin i gat wanpela polisman tasol, o wanpela nes husat i mekim bikpela wok tru long lukautim bikpela populesen.

Ol arapela pablik sevan i no laik go wok long ol kain ples olsem bikos ol i no inap lukautim gut famili bilong ol.

Ating i mas gat sampela kain insentiv long kirapim tingting bilong ol pablik sevan long go wok long ol kain ples olsem.

Gavman i givim mani insentiv long ol spotman i winim gol, silva na brons medal long dispela Pasifik Gems, orait em i ken givim wankain insentiv tu long ol pablik sevan husat i mekim bikpela sakrifais long go wok long ol ples longwe tru long taun.

Dispela tupela wik bilong amamas na paitim bros i pinis. Nau em i taim bilong taitim bun, skelim tingting na mekim gut wok.

Nesenel gavman i traim long bringim developmen i go long olgeta kona bilong kantri.

Yumi olgeta pipel bilong kantri tu i mas wok bung wantaim gavman long helpim ol pipel bilong yumi.

# Polye: LNG mani we?

OPOSISEN lida Don Polye i askim gavman long no ken haitim mani we gavman i wok long kisim long PNG LNG Projek.

Mista Polye i salensim gavman long kamaut ples klia na tokim ol manmeri bilong kantri long hamas stret PNG gavman i wok long kisim long dispela bikpela K43 bilen ges projek.

Polye i lekim dispela toktok bihain long ExxonMobil i salim i go aut moa long 100 LNG kago i go long ovasis maket.

Maski ExxonMobil i salim pinis moa LNG, ol papagraun tu ol i no kisim royelti mani bilong ol. Long dispela as tasol, ol papagraun i wok long strong long pasim projek long Hides na Kutubu.

"Gavman i noken giamanin ol pipel bilong kantri. Gavman i noken paulim ol papagraun. Gavman i mas tok aut ples klia long ai blo mipela olgeta na tokim pipel bilong dispela kantri long hamas mani em i wok long kisim long PNG LNG Projek," Polye i tok.

Gavman i no mekim tu wanpela namba wan samting



**Bikpela LNG tenk long PNG LNG plent sait klostu long Pot Mosbi.**

bilong yusim gut LNG mani na tu ol mani gavman i wok long kisim long ol arapela samting olsem gol, kopa n ages.

"Sovren Welt Fan (SWF) em i wanpela nambawan samting bilong lukautim gut mani i kam long LNG projek na ol arapela projek tu wantaim. Tasol gavman i no pasim loa bilong

kamapim dispela SWF," Polye i tok.

Ol samting bilong kamapim SWF em i stap long han bilong gavman. Gavman i mas kamapim wanpela loa pastaim long larim SWF i kamap.

Aninit long SWF, gavman i ken lukautim gut na yusim gut ol mani em i save kisim long

LNG projek na ol mani em i kisim long gol, kopa na ol arapela samting.

"Gavman i mas kamapim SWF hariap bikos mani em bai kisim em i mani bilong pipel bilong dispela kantri. Mani bilong pipel i mas go stret long SWF na pipel i mas save hamas stret gavman i kisim long dispela bikpela LNG projek," Polye i tok.

Fainens Minista James Marape i tok gavman bai hariap tru kamapim dispela loa long kirapim SWF. Marape i tok gavman i luksave long SWF olsem wanpela gutpela samting we em i ken larim gavman i yusim gut mani long ges na ol arapela projek.

"Mipela i luksave long ol sampela samting nogut ol bipo gavman i bin mekim. Nau gavman bilong O'Neill bai no inap long mekim gen ol dispela kain samting nogut," Marape i tok.

Em i tok gavman bai yusim gut olgeta mani em bai kisim long PNG LNG Projek na gavman i nau stretim ol samting bilong kirapim SWF.



Published Weekly, Thursday, for Word Publishing Company, Ltd.

P.O. Box 1982, Boroko, NCD  
Papua New Guinea

Telephone: (675) 325 2500

Fax: (675) 325 2579

Email: [editorial@wantok.com.pg](mailto:editorial@wantok.com.pg)

Websait: [www.wantokniuspepa.com](http://www.wantokniuspepa.com)

Pe bilong wanpela yia, 52 niuspepa

**Ples:**

PNG

AUSTRALIA

ASIA PACIFIC na JAPAN

AMERICA na EUROPE

**Air:**

K220.00

US\$110.00

US\$150.00

US\$210.00

**General Manager**

Elizabeth Konga

**Editor**

Veronica Hatutasi

Published at Able Building Complex, Sec 58 Lot 02, Waigani Drive.

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.





Ol poto na stori kam long ABC News



**AUSTRALIA**

POLIS i helpim long stopim ol bot we ol i saspek olsem ol i bilong ol asailam sika long not-wes kos bilong WA i les long toksave long wanem hap bot i stap o wanem samting i kamap long husat i stap antap long bot taim em i kamap long sua.

Ol kru memba bilong wan-pela oil tenka i lukim wan-pela bot ol i bilip olsem i mas bilong ol Vietnam asailam sika long Mande moning olsem 70 kilomita ausait long nambis.

Ol i no save hamas pipel tasol ol i bin luk olsem ol i orait.



**AUSTRALIA**

BIKNEM Seta o pilal long ol bikpela wev long solwara, Mick Fanning, i go bek long haus long Gold Coast bihain long em i amamas long poro bilong em i helpim taim sak i laik kaikai em long J-BE Open long Saut Afrika. Julian Wilson i swim go bek long helpim long paitim sak na rausim taim sak i laik kaikai Fanning. Fanning i kolim Wilson olsem waria o strongpela man husat i helpim em taim em i pret no gut tru.



**AUSTRALIA**

OL polis i karim ol gan na go sanap ausait long haus long Pascoe Vale, olsem hap bilong wanpela investigesen o wok painim long wanpela polis ol i bin sutim long Julai 7. Ol i kalabusim tupela man bihain long tupela i sutim, Konstebel Ben Ashmole i gat 31 krismas.



**AUSTRALIA**

JANECK Jansen i save stap 5-pela awa long deti wara bilong golf kos. Tupela bekpeka bilong kantri Holan i kisim olpela bos bilong tupela i go long kot bihain long tupela i tok em i no save kisim bikpela mani long wok bilong tupela. Em i no gutpela wok tasol em i wan-pela bilong ol wok we Janek Jansen na Jose de Vries i ken painim taim tupela i kam long Australia long wok holide visa.

**BRITEN**

KOSMOLOJIS bi-long Briten, Stephen Hawking i opim bikpela wok painim aut long lukim laip ausait long graun insait long 10-pela yia. Dispela projek i kosim \$135 milien long glasim skai. Bisnis man bilong Russian Silicon Valley, Yuri Milner, husat i givim mani long dispela bikpela inisitiv, i tok em bai wan-pela bikpela wok painim aut long sains we i kamap long painim narapela laip i gat bikpela save ausait long graun. Mista Hawking i tok long opening olsem i mas gat ol narapela laip long dispela yunives o skai.





# Tian Ping amamas long kalsa na pasin PNG



Tian Ping wantaim pani kru bilong Kanage.



Tian wantaim ol wantok bilong em bilong Saina.

**Mathew Yakai i raitim**

**TIAN** Ping em wanpela yangpela man bilong Hubei provins long Saina, husat nau i wok i stap long Madang olsem wanpela loya wantaim Ramu NiCo main.

Em i bin go long Madang long Januari 15, 2014.

Planti ol wanwok bilong em long Ramu NiCo i save kolim em 'David' tasol.

Dispela yangpela man i guria na i amamas tru long stap long Madang provins bikos em i tok PNG em wanpela narakain kantri tru wantaim planti kain kain tumbuna bilas na pasin na kastom. Ne em i amamas tru olsem em i kam krungutim dispela naispela ples long wol.

Long mun Me, 2015, David i soim bikipela amamas bilong en tru na i apim tru nem bilong Papua Niugini, taim em i go lukim ol naispela bilas na kala i kamap long Divain Wod Yunivesiti (DWU) Open De.

Dispela open de i lukim ol stadi dipatmen long DWU i soim ol skul program bilong en long pablik long pulim intres bilong ol nupela lain long go skul long hap, na tu promotim ol program bilong en long ol ausait lain long save.

Antap long dispela open de tu i lukim sampela ol sumatin i bilas na soim kalsa na pasin tumbuna bilong ol wantaim ol naispela bilas.

Em i lusim papamama bilong em na i go wok na stap long Madang, tasol em i save go kam long ol holide bilong em bihain long 5-pela mun.

Dispela yangpela saveman i gat naispela ekspiriens long sait long kalsa.

Taim em i stap long Zhejiang Yunivesiti long Saina long 2007 i go long 2011, em i stadi long tok ples Japan na i kisim digri.

Bihain long dispela em i go stap wanpela yia long Nagoya long Japan na em i ken tokples Japanis gut stret.

"Taim mi stap long hai skul, mi save gat bikipela intres long histori bilong Japan," David i tok.

Bihain long em i pinisim stadi bilong em long Japan, em i go bek long Saina na i go skul long wanpela namba wan yunivesiti long hap ol i kolim Renmin Yunivesiti na i greduet wantaim Mastas digri long Lo. Renmin yunivesiti em wanpela skul planti i save driman long go long go long en, tasol David i soim tru save bilong em na go long hap.

Taim em i stap skul yet long hap ol i makim em long go long Seoul long Sout Korea long 2012 i go 2013 na David i go stadi long Lo bilong Korea. Olsem na long nau yet David i ken tokples Japan, Korea, English na tokples bilong em yet long Saina.

"Planti ol ekspiriens bilong mi em long ol Esia kantri, tasol mi luksave nau olsem PNG em wanpela narakain ples tru na mi amamas tru olsem mi kam long hia na lukim dispel," David i tok.

David i bin bungim paniman Kanage long DWU open de na i kisim poto wantaim em. Em i amamas tu long penim pes bilong em na wokabaut raun na baim ol nekles na ol bilas bilong PNG.

"Mi yangpela man yet na mi laik raun na lukim ol ples na tu save gut long ol pasin na kastom blong ol arapela ples na mekim poroman wantaim ol," David i tok.

David i laikim stret ol eria insait long DWU we i gat planti diwai na gras na ol flaua.

Em i tok olsem long Saina, ol yunivesiti i save gat planti tausien sumatin na ol bilding i bikipela tumas na ples save pulap tru na i gat planti ol leksera na profesia i wokabaut raun.

David i kam long Hubei provins long China we long hap ol i save kolim ples ya olsem 'Graun bilong Pis na Rais' na dispela ples i gat ol arapela egrikalsa prodak olsem koton, rais, wit, ti na ol arapela indastri olsem ples bilong wokim kar, ol arapela masin na tu wokim kamap pawa na ol bikipela teknoloji.

"PNG em naispela kantri, wantaim planti gutpela bus, wara, solwara na ol pipel na Madang em naispela ya," David i tok.



Tian wantaim ol Biuti Kontesten.



Em sanap wantaim ol gels bilong kainkain kalsa .



# Stori bilong tumbuna



## Tewel kilim selpis man

**L**ong wanpela ples i gat lol man na meri i pulap tru i stap. Ol i sot tru long kaikai na i hatwok tru long painim kaikai. Wanpela man namel long ol i no save skelim kaikai, em i selpis tumas na ol man na meri na pikinini i no save laikim em.

Wanpela de dispela man i go painim abus long bus, na em i no painim abus, bilong wanem tewel tu i go. Man ya i go lukim wanpela prut bilong diwai ol kapul i save kam kaikai long nait. Em i tok, bai mi kam bek long nait na sutim wanpela kapul. Tewel tu i harim pinis na em i go.

Man i go bek gen long haus na stretim banara na wetim mun long nait.

Taim mun i kirap na em i go, tewel i askim, kandere yu laik go we?

Mi go lukautim kapul long bus. Mi laik kam wantaim yu, tewel i tok.

Tupela i kamap long as bilong diwai na lukim planti kapul i pait.

Kandere yu painim rop na mi goap long diwai. Tewel i tok, mi painim pinis, yu kisim na goap.

Man i ting em i rop tru. Em i kisim na goap long diwai. Em i go antap pinis, na em i putim rop long nek bilong em. Na em i sutim ol kapul i go daun long graun.

Man i harim ol bun bilong kapul i pairap na em i askim. Kandere yu mekim wanem? Tewel i tok, mi bungim ol kapul. Tasol em i no bungim ol em i kaikaim ol nupela kapul pinis.

Man i pret nogut tru. Em i brukim han bilong diwai na redi long tromoi i go longwe, na em i tok, kandere yu was gut. Mi laik sutim kapul i etap longwe tru.

Man em i tromoi han bilong diwai longwe tru long ples nogut. Nau tewel i ting em i kapul na em i go kisim. Naum wantu man i kam daun na ranawe long haus.

Tasol taim man i laik rausim rop em i hangamapim long nek, em i pas.

Tewel i kam lukim na man i go pinis nau tewel i singaut, Masel. Na rop i stap long nek bilong man i bekim tok, yes. Man ya em i kirap nogut, na em i laik rausim rop tasol rop i pas strong long nek.

Em i larim rop i step na i ranawe long ples.

Man i laik opim dua tasol nogat, em i dai.

Tewel i kam na kamautim tupela ai bilong em na em i kaikai.

Ol i manmeri i lukim bodi bilong em long moning na pl i planim.

W. Mano Lapa,

# Raun wantaim Wantok kru ...



## Muvi posta bilong Terminator 4 - Genisys

**J**ohn Connor i salim Kyle Reese i go bek long taim long protektim Sarah Connor, tasol taim em kamap long yia 1984, kain kain samting i kamap long stopim wok bilong em.

Lapun Arnold Schwarzenegger i nau kamapim Terminator 4 – Genisys i tok, mi mas pinisim dispela muvi we mi bin statim

long Terminator 1 taim mi yangpela i kam long Terminator 2 na 3 na nau mi lapun.

Olsem na mi mas pinisim sapta 4 bilong Terminator olsem mi stap lapun nau.

Dispela muvi i gat planti eksen tu olsem ol arapela Terminator muvi bai kirapim bel bilong ol fen bilong mi na yu bai amamas long sindaun isi na watsim muvi long haus o tiata bilong yu.

**Darekta:**  
Alan Taylor

**Ol Raitas:**  
Laeta Kalogridis, Patrick Lussier, 2 more credits »

**Stars:**  
Arnold Schwarzenegger, Jason Clarke, Emilia Clarke

### TOKSAVE:

WANTOK i askim ol gutpela rida bilong em long salim ol tumbuna stori i kam na bai mipela i putim long niuspepa. Sapos stori bilong yu i gutpela na mipela i putim long niuspepa, bai yu winim **K50** we mipela bai salim i go long akaun bilong yu, o salim mobail yunit inap long **K50** i kam long fon bilong yu. Salim nem, edres na mobail namba bilong yu wantaim stori i kam long dispela edres: *Stori Tumbuna, Wantok Niuspepa, Cl-Word Publishing Company, P O Box 1982, BOROKO, NCD, PNG* o email edres: [editorial@wantok.com.pg](mailto:editorial@wantok.com.pg) Telepon namba: 3252500.

Tenkyu





# TOK PISIN NEWS

from Radio Australia

radioaustralia.net.au

Harim TOK PISIN long  
Radio Australia  
**101.9FM**  
Port Moresby

**Tok Pisin Service**  
6am - 7am 6080; 7240(KHZ)  
7pm - 9pm 5995; 6020; 9710; 1280(KHZ)



OI TSI Executive memba i sanap wantaim Praim Minista Sogavare. Foto: ABC

## Solomon Ailan gavman i tromoim mani i no stap long baset

GAVMAN bilong Solomon Ailan i wok long tromoim planti milien dola long mani bilong gavman we i no stap long baset, Philip Manakako, Risets na Komyunikesen opisa bilong Trensperensi Solomon Ailan (TSI) i tok.

TSI i tokaut strong long pasin we koalisen gavman bilong Praim Minista, Manasseh Sogavare, i bin tromoim planti milien dola long ol samting i no stap insait long baset.

Ol dispela mani i gat long en 900,000 dola long slip, kaikai na ol narapela samting we tripela gavman minister i yusim taim ol i stap long wanpela lakseri hotel long Honiara sampela mun i go pinis.

Gavman i bin tromoim 3.7 milien dola tu long "gavman sapot" long dinau bilong ol grup insait long koalisen gavman taim ol i wok long traime long kirapim gavman.

Narapela em long yusim \$2 milien long wanem ol i kolim long Forbes Bill gavman i no baset long en.

TSI i tok ol dispela kain kos we i kam aut long mani bilong ol pipel i no soim gutpela pasin bilong gavman ol i toktok olgeta taim long en.

## Sampela samting we i mekim PNG i win bikpela long Pasifik Gems

CHEF de Misino bosman bilong Tim Papua New Guinea, Richard

Kassman i tok i gat tripela bikpela as long bikpela win bilong Tim PNG long 2015 Pasifik Gems.

Mista Kassman i tok wanpela em long sait bilong mani.

Em i tok gavman i givim planti mani long redi long Gems.

Em i tok ol i kisim mani na i bin gat tripela yia long redi.

Em i tok narapela tu em long gutpela plening na rot ol i karim aut gut ol plen bilong ol.

Mista Kassman i tok narapela em long Hai Pefomen Senta na sait long ol ekspet o savemanwe i stap long helpim long sait long ol wan wan spot.

Na tu em i tok ol hat wok long trening bilong ol etlit, sakrifaise bilong ol na wan wan famili bilong ol na help na sapot bilong kantri.

Mista Kassman i tok PNG i wokim gutpela tru long Gems na dispela i mekim em i amamas moa yet.

## PNG i soim gutpela bel na tingting long Pasifik Gems: Andy Bawa

POLIS long Nesenel Kapitel Distrik long Pot Mosbi, PNG i amams long sait bilong sekyuriti long taim bilong Pasifik Gems, PNG NCD Metropolitan Polis Suprintenden Andy Bawa i tok.

Taim Pasifik Gems i stap, Suprintenden Bawa i bin askim ol pipel long gohet long soim gutpela bel na tingting long ol etlit na visita i stap long Gems long Pot Mosbi.

Em i tok sekyuriti long Pot Mosbi long taim bilong Gems i kam inap em i pinis i bin gutpela tru.

Mista Bawa i tok ol toktok ol i kisim long ol etlit na opisel bilong narapela kantri i olsem ol pipel bilong PNG i soim gutpela pasin long ol.

I bin gat strongpela sekyuriti long klosing seremoni long Sarere, wankain olsem long opening seremoni.

Na Superintenden Bawa i tok gutpela pasin na gutpela bel we ol pipel bilong PNG i soim emol wan-pisin bilong narapela kantri bai kisim i go bek long ol wan wan kantri bilong ol.

## Saiklon i bin bagarapim wok redi bilong Vanuatu long Pasifik Gems

WANPELA lida long spots development long Vanuatu i tok pili we ol pilla bilong Vanuatu i soim long 2015 Pasifik Gems long Pot Mosbi i no soim truru mak long sait long spot bilong Vanuatu, Joe Carlo em CEO bilong 2017 Pasifik Mini Gems we Vanuatu bai hostim i tok.

Fiji i bin winim Vanuatu long soka long Pasifik Gems .

Vanuatu i bin winim tupela gold, 8- pela silva na 12- pela brons medol.

Mista Carlo i tok Vanuatu i no bin redi gut long wanem em i wok long kamap orait t yet long Saiklon Pam we i bin bagarapim kantri long mun Mas long dispela yia.

Em i tok saiklon i bin kamapim hevi long ol wan wan spots man na meri na tu long ol fasiliti.

Mista Carlo i tok Vanuatu i bin tokim Pasifik Gems Kaunsel na ol

ogenaisa long PNG olsem em bai no nap kam long pilai.

Tasol em i tok Vanuatu kam long Gems wantaim helpim bilong PNG gavman na ol Pasifik Gems oge-naisa long Pot Mosbi.

## Lo trening bilong ol meri long PNG

OL meri loya bilong PNG inap mekim ol kain wok olsem ol man loya bihain long helpim i kam long ol meri loya bilong Australia.

Dairekta bilong Legal Training Institute, Pauline Mogish i mekim dispela toktok bihainim ol trening we sampela meri loya bilong Victoria i bin givim long 40 ol nupla lo greduet long Pot Mosbi long wik i go pinis.

As tingting bilong dispela trening i bilong helpim ol dispela nupela meri loya long save gut long ol rot bilong strongim wok bilong ol taim ol i stat wok.

Dispela trening is tap aninit long ol wokbung i stap namel long Legal Training Institute na Victorian Bar em gavman bilong Australia i givim mani long sapotim, Misis Pauline Mogish i tok.

## Vanuatu Suprim Kot i rausim mutini keis

SUPREM kot bilong Vanuatu i bin rausim wanpela keis bilong mutini long polis fos, oa pasin bilong ol opisa i go egensim komanding opisa.

Dispela em i mutini keis we Polis Komisina bipo, Arthur Caulton i bin bringim egensim moa long 10-pela senia opisa long Vanuatu polis fos.

Niusman long Pot Vila, Hilaire Bule i tok stori long dispela keis i bin stat long 2010 yet na em ibin bringim split o brukim polis fos long tupela hap.

Em i tok mutini keis we i bin kamap agensim tupela Polis Komisina stat long 2010, i bin mekim tu split long sait long nesinel politik.

Bule i tok dispela i wanpela as tu long ol politikel hevi long kantri.

## Hat wok i bringim gol long ol PNG

OL wanwan spot insait long PNG Atletiks i amamas long ol i winim planti gol long Pasifik Gems,

Tony Green Presiden bilong Papua New Guinea Atletis Yunion i tok.

Mista Green i tok strong na bilip bilong planti etlit o ol lain bilong ron, na ol narapla pilai bilong PNG i winim ol gol medal long wanem ol i mekim ol trening long planti yia pinis.

Dispela em toktok blong Tony Green Presiden bilong Papua New Guinea Athletics Union bihain long ol memba bilong yunion bilong en i bin winim 6-pela gol medol.

Wanpela long ol dispela etlit em sempion meri bilong ran long Pasifik rijon, Toea Wisil husat i bin winim Gol medol long 100 mita resis.

Moa long 15 tausen pipel ibin stap long BSP stadion na lukim Mis Wisil i bin winim displea resis.

## Vanuatu i kisim tingting long we bilong ranim 2017 Pasifik Mini Gems

VANUATU bai ranim Pasifik Mini Gems long yia 2017 na em i bin go lukluk long Pasifik Gems long Pot Mosbi long kisim sampela tingting.

CEO bilong 2017 Pacific Mini Games, Joe Carlo i tok as tingting em long kisim sampela tingting long rot we ol i ken ranim Mini Gems long Vanuatu.

Mista Carlo i tok em i gutpela long rijin i serim ol save long we bilong ranim ol gems we bai lukim ol liklik kantri tu i ken ranim ol kainkain gem.

Mista Carlo i bin kisim bikpela luksave long Intanesenel Olimpik Komiti long ol wok bilong en wantaim Oseania Nesenel Olimpik Komiti na long Vanuatu yet.

Dispela em i Silva Awod Oda bilong Olimpik we liklik namba bilong pipel long Oseania wantaim tu Australia Nu Silan nau i bin kisim.

## Gol Ridge Maini tromoi poin wara long Metapono Riva

SIAMAN bilong Gol Ridge Komyuniti Invesmen Limited, Walton Naezon i tok ol i kisim tok orait pinis long tromoi wara we i stap antap long Tailings Dem bilong Gol Ridge Main i go insait long wara we i stap klostu.

Mista Naezon i tok papa bipo bilong Gol Ridge Main long Solomon Ailan i bin mekim pasin olsem wanpela kauboi taim em i bin lusim dispela main na planti hevi bilong en.

Mista Naezon i mekim dispela toktok long dispela wik taim oli redi long rausim isi isi sampela wara long tailings dem we ol i save putim ol posin pipia bilong main long en.

Gavman i bin makim dispela ples olsem wanpela stet ov disasta bihain long dispela tailings dem i bin pulap tru long wara na i bin gat wari olsem em bai kapsait na autim ol posin olsem sainaid na asenik bai go aut long envirmen.

Wanpela maining kampani bilong Australia em ol i kolim St Barbara i bin papa bilong dispela main, tasol em i bin salim i go long papagraun kampani em Mista Naezon i go pas long en.



# Tupela divelopa soim laik long Sepik egrikalsa projek

Stanley Nondol i raitim

**TUPELA investa i soim strong-pela laik long wokim malti bilien kina invesmen long Sepik Plein Ikonomik Zon long Yangoru Saussia Distrik long Wes Sepik provins.**

Tupela investa em Pasifik Balens Fan na LR Grup bilong kantri israel.

Oi i makim maus man bilong tupela kampani i kamap long is Sepik long dispela mun long lukluk raun long bikpela graun long Sepik Plein we bikpela komesel egrikalsa projek olsem welpam, ketel, poltri, rais faming, kakao na ol arapela projek bai kamap long en.

Oi dispela lain tu bin kamap olsem ol ges o visita long Yangoru SME de we Minista bilong Tred Komes na indastri Richard Maru i putim long Julai 3 2015 long Yangoru gavman stesen.

Tupela investa i kam long kamapim join vensa bisnis long statim bikpela poltri na kakaruk fid projek we em bai givim saplai long maket long Is Sepik taim projek i pinis.

Minista Maru i tokaut long dispela taim olsem nesenel gavman

bai stretim ol agrimen long dispela mun yet namel long wanpela biknem intanesenel oil palm kampani long divelopim bikpela Oil Palm projek long Is Sepik plein.

Bot Siaman bilong Pasifik Balens Fan, Robert Igara, i tok ol lida bilong is Sepik provins i mekim bikpela wok long divelopmen bilong Papua Niugini na nau em i taim bilong ol kampani olsem Melanesien Tras Limited long kam insait na divelopim provins.

Mista Igara i tok em lukim olsem Is Sepik i gat bikpela graun long wokim ol bikpela agrikalsa projek long ol pipel bilong is Sepik na Papua Niugini bai kisim sevis.

Em i tok long bisnis, egrikalsa i gat bikpela sans long diveopim ples na i ken senisim kantri.

Em i tok mipela i amamas long wok patna wantaim LR Grup bilong Israel long mekim invesmen long divelopim poltri projek, na ol arapela egrikalsa projek long is Sepik.

Mista igara i tokim ol pipe bilong Is Sepik na divelopmen patna olsem em bai toktok wanataim ol bot bilong trasti bilong Pasifik Balens Fan long wok bung wantaim LR Grup long kirap ol bikpela egrikalsa projek long hap.



Sepik plein we Oil Palm projek bai kamap long en.

# Indipenden odit tim sekim Ramu NiCo OEMP

WANPELA independen odit tim bilong Australia na tu ol opisa bilong Dipatmen ov Enviromen na Konsevesen (DEC) i bin karimaut wanpela wok painimaut o odit i go insait long enviromen wok bilong Ramu NiCo Menesmen (MCC) stat long mun Jun i go long Julai 7, 2015.

Dispela independen odit tim em nem bilong en BMT WBM, na tupela wokman bilong en Jeremy Visser na Dave Houghton i bin go long Kurumbukari Main na tu long Basamuk Rifaineri bilong Ramu NiCo long wokim odit o wok sekim long sait bilong operesen enviromen menesmen plen.

Dispela odit i kam aninit long maining indastri lo bilong PNG na i ol wok painimaut i mas kamap long ol operesen enviromen menesmen plen (OEMP) bilong Ramu NiCo. Dispela i save kamap olgeta yia.

. Wankain odit i bin kamap pas-



taim long OEMP bilong Ramu NiCo we i lukim ol autsait o independen lain i wokim na glasim stret sapos kampani i bihainim stret lo o nogat long wok bilong en long was gut long bus, graun na wara long eria we em i wok long en.

Ripot i soim olsem Ramu NiCo i gat OEMP we i sotpela taim olsem

na DEC i bringim wanpela independen lain long karimaut odit o wok sekim long wok bilong Ramu NiCo.

DEC klostu taim bai senisim nem bilong en i go long Konsevesen na Enviromen Proteksen Atoriti (CEPA).

Oi saveman bilong DEC husat i stap tu long lukluk long odit i

kamap em Dokta Lemas Pangum na Robert Sina na ol lain bilong Ramu NiCo em deputi jeneral menesa bilong Helt, Sefti na Enviromen Koporet opis, Steven Liwei na Zhou Pan.

Wok sekim i lukim ol lain i glasim wok bilong OEMP na wanem ol wok i kamap pinis.

Oi lain odita i askim Ramu NiCo

Oi lain odit tim long KBK Mine sait  
Oi lain odit tim long Basamuk Rifaineri.

long wokim sampela samting na tu ol i amamas tu long sampela wok em kampani yet i karimaut long daunim ol hevi i kamap long enviromen.

Fainol ripot bilong dispela odit em ol bai givim DEC na Gavman na tu Ramu NiCo sampela taim bihain.

**"Friends"**  
**"Kaibigan"**  
**"Wantoks"**

1975

**Air Niugini**  
www.airniugini.com.pg

EXCLUSIVE CARRIER FOR THE 2015 PACIFIC GAMES

PORT MORESBY 2015 XV PACIFIC GAMES

**TODAY**



# Israel kampani i lukluk long Egro projek

Stanley Nondol i raitim

**WANPELA kampani bilong Israel i lukluk long wokim ol kaikai bilong ol animal olsem marasin bilong kakaruk, pik na ol arapela long PNG, na daunim kos bikos PNG i save kisim ol dispela samt-ing long ovasis.**

Menesing Dairekta bilong LR Grup kampani, Ilain Weiss i tok kampani bilong em i gat nem long wokim ol bikpela egrikalsa projek na PNG i gat bikpela graun i i ken kamapim bikpela projek long mekim bikpela winmani long bisnis bilong em na komyuniti.

Mista Weiss i tok kamapni bilong em i putim pinis ol kepitol na risos long wokim ol projek long Is Sepik plen long kamapim bikpela Egrikalsa projek.

Em i tok PNG i ken wokim ol kaikai o marasin bilong kakaruk na pik na ol arapela animal olsem ketel. Dispela bai helpim ol lasples fama long baim ol marasin long lik-

lik mani bikos nau em PNG i save kisim long ausait na ol fama i baim long bikpela mani.

Namba wan hap bilong dispela projek em long planim bikpela tausen hekta bilong kon, meis, soia bin na bai givim i go long sepik plein projek na tu ol pipel long hap wantaim ol liklik blok holda long ol i ken kaikai .

Mista Weiss i tok LR Grup tu bai givim sid long ol asples manmeri long ol i ken planim na kaikai na i ken salim long projek long mekim mani.

Na narapela step bilong projek em long em long kamapim hetseri we ol bai groim ol kakaruk bilong kisim kiau, leya na mit. Ol kiau na mit bai ol i salim long Sepik Oil Palm projek, distrik, provins na tu long kantri.

Ol asples manmeri i ken baim ol bebi kakaruk na statim kakaruk bisnis long haus bilong ol.

Mista Weiss i tok dispela projek bai daunim namba bilong kakaruk

wel Is Sepik i save kisim long ol ausait provins na i bai givim saplai long provins na kantri wantaim.

Moa long en, Mista Weiss i tok dispela projek bai yusim ol bikpela teknoloji o save bilong Israel na planim kakao we graun long hap em i moa gutpela long planim kakao diwai na kaikai bilong em bai moa long 500 pesen.

Mista Weiss i tok em i save olsem i gat bikpela salens long ol kain bikpela projek tasol wantaim sapot bilong Minista bilong Tred na indastri na gavman na komyuniti, projek bai kirap long liklik traim long gutpela bilong kantri na kmapni bilong em .

Em i tok kantri bilong em Israel em i deset kantri tasol insait long 40 yia ol i tanim deset kamap gupela graun bilong egrikalsa projek .

Em i tok em i gat bikpela bilip olsem em i gutpela taim long ol pipel bilong PNG i ken go long promis len bihain long 40 yia.

# Ol Esia stua sasim yet fi

## ...Maski benk tok no gat

James G. Kila i raitim

**PLANTI ol stua, supamaketa na ol arapela lain long kantri i wok long sasim ol kastoma na kisim yet ol fi taim ol I yusim EFTPOS masin long baim kaikai.**

Ol dispela lain i brukim lo bilong benk long sasim ol benk fi long ol kastoma.

Long Madang provins, sampela stua i wok long sasim 50 toea long ol kastoma long sekim balens bilong ol. Na sampela i wok long sasim moa sapos yu laik kisim kes bihain long ol baim kaikai long stua.

Planti ol kastoma i no amamas long dispela pasin na i askim ol benk na tu reguleta olsem Benk ov PNG long kamaut na mekim sampela tok klia o tokaut long lo we ol kastoma i ken save.

*Wantok Niuspepa* i lukim planti ol stua i brukim lo bilong benk long sasim fi long ol kastoma, tasol ol kastoma i save painim hat long toktok bek wantaim ol dispela ol stua lain bikos ol i nidim stret long kisim mani o baim samt-ing na planti taim i no gat rot.

Wanpela kastoma i bringim belhevi bilong em long pablik bihain long em i lukim risit bilong EFT-POS masin long stua i soim olsem ol i sasim 50 toea.

Dispela i bihain long em i baim sampela kaikai long stua na tu long taim ol i laik sekim benk balens bilong em.

Insait long wanpela awenes bilong ol Benk Saut Pasifik (BSP) long Madang sampela yia i go

pinis, BSP Menesa Benking Edukesen, Cynthia Aisi i tok olsem ol kastoma i gat rait long ripotim husat stua i sasim benk fi.

Mis Aisi i tokaut olsem ol kastoma i ken tokim ol BSP wokman meri na soim ol wanem stua i sasim ol benk fi bihain long kastoma i yusim EFTPOS.

Em i tokaut olsem ol stua i no ken sasim ol fi long ol kastoma long EFTPOS sevis bikos agrimen namel long benk na stua lain i stap pinis long pepa olsem ol bai no inap sasim wanem kain benk fi nabaut long ol kastoma.

Tasol dispela toktok bilong em i go wara nating bikos planti ol stua bilong ol Esia lain i wok long go het yet long sasim ol benk fi long ol kastoma.

Mis Aisi i tokaut tu olsem sampela ol kastoma i no wanbel o i no amamas ol i ken bringim belhevi bilong ol i go long BSP na ol wokman bai go mekim wok painimaut long dispela ol stua na bihain rausim dispela EFTPOS sevis long dispela ol lain stua.

Sampela mama long Madang i no amamas long kain pasin ol stua long taun i wok long mekim. Planti ol dispela stua em ol Saina lain i papa long en na sampela long ol i stap long ol strit long Nu Taun long Madang.

Wanpela kastoma, Peter Morris, i tokaut olsem ol dispela stua bilong ol lain Saina i save mekim kain kain pasin stret long sasim ol kastoma long yusim kad long baim kaikai long stua bilong ol.

Em i tok ol wokman bilong BSP na ol arapela komesel benk i no save mekim wanpela samt-ing long ol lain stua bilong Saina.

## PNG i gat bilip long wokim bisnis wantaim France

PRAIM Minista Peter O'Neill i tok Papua Niugini i gat strongpela bilip long gutpela pren wantaim kantri France long bisnis na wok.

Mista O'Neill i tok pren namel long tupela kantri i gro moa strong nau na i lukim planti pipel bilong France i stap na wok long kantri na tu mekim bisnis long hia.

Mista O'Neill i mekim dispela tok-tok long nesanel de bilong France long las wik long Pot Mosbi.

Mista O'Neill i tok namba bilong ol pipel bilong France long kantri bai go antap wantaim nupela LNG projek i kamap long Galp provins.

Em i tok PNG i tok welkam long prensip na wok bisnis namel long tupela kantri.

Em i tok PNG tu i gat luksave olsem France i helpim long teknikal save em i givim long PNG.

Praim Minista O'Neill i tok long LNG projek, France kampani Total we i go pas long namba tu LNG projek i wok long mekim bikpela wok long kirapim ikonomi na bisnis long Papua Niugini.

Em i tok Papua LNG projek bai kamapim moa long 10,000 wok bilong ol pipel bilong PNG.

Mista O'Neill i tok PNG i lukim dispela olsem wanpela bilip France i gat long mekim bisnis long kantri na PNG i lukluk long wok bung wantaim long dispela LNG proejek.

Em i tok long raun bilong em i go

long kantri Paris em i bungim 30-pela bisnis haus i makim 60 pesen bilong GDP bilong France i soim bikpela laik long mekim bisnis long Papua Niugini.

Em i tok welkam long ol kampani jusat i soim laik long kam mekim bisnis long PNG.

Mista O'Neill i tok long strongim moa wok bisnis, PNG gavman i tok-tok wantaim gavman bilong France long putim wanpela embesi long Paris.

Em i tok PNG bai wok bung wantaim France long ol arapela eria bilong developmen olsem hevi bilong klaimet senis we em i bikpela hevi long Pasifik Ailan kantri.

## Tausen go lukim SME de long Yangoru..



Planti tausen manmeri na skul pikinini i kamap long Yangoru stesen long SME de long Julai 3. Long piksa em ol skul pikinini i kam harim na lukim ol SME o liklik bisnis ol pipel bilong Yangoru distrik i soim long pablik.



# Ol fama long KBK bai kisim mani long salim fres kumu

**OL RUREL fama long Kurumbukari insait long Usino-Bundi, Madang provins bai kisim gutpela mani nau taim ol i salim ol pres gaden kaikai na kumu i go long NCS-Raibus Ltd ketering servis mes.**

Olgeta de, NCS-Raibus Ltd i save givim moa long 1,320 plet kaikai long ol wokman meri bilong Ramu NiCo KBK Main na dispela em bikipela namba tru.

Olsen na i gat nid long moa pres gaden kaikai na kumu we ol papagraun i mas groim na salim i go long ol.

Asisten Operesens Menesa bilong NCS-Raibus Ltd, Collin Baim, husat i lukautim KBK Main mes na Basamuk Rifaineri mes i tok, KBK mes i save baim ol pres gaden

kaikai we mani mak bilong en em K10,500 long wan wan wik, na moa long K40,700 long wan wan mun long baim ol pres gaden kaikai na kumu tasol.

“Kontrak bilong mipela i stap wantaim ol lokal papagraun long KBK we i gat 7-pela long ol husat i save wok klostu wantaim mipela long saplaim ol kumu na ol arapela gaden kaikai,” Mista Baim i tok.

KBK i gat tupela mes o ples kaikai we i save laikim tumas ol pres kumu na kaikai bilong PNG long ol plet bilong ol.

NCS-Raibus i save kisim ol mit na ol abus bilong en long ol saplaim long Lae we i bihainim strongpela helt lo na kwarentin sekap long luksave olsem ol abus i orait long sait long kwaliti na gutpela long kaikai.



Ol wok man long KBK main i sanap long kisim kaikai long mes. Foto: Mathew Yakai

## Australia helpim long putim kolta long Bogenvil

**SENTRAL Bogenvil i kisim bikipela helpim long putim kolta long bikipela rot namel long Morgan Rot Bung i go long Tunuru wantaim tingting bilong kamapim strong iekonomik developmen, isi rot na sefti bilong ol asples lain.**

Wok bilong silim o putim kolta long dispela rot i kos K8.25 milien we PNG-Australia Transpot Sekta Program wantaim Bogenvil Dipatmen bilong Teknikol Sevis i wokim. Dispela em i hap helpim bilong Australia long kamapim gutpela infrastraksa long Bogenvil rijon.

Dispela projek i wok tu long klinim ol sait bilong rot, putim ol mak long rot bilong ol kar bai ran

long sefti na ol i putim tu ol nupela trefik sain wantaim tupela PMV stop klostu long ol maket. Ol rot i go long Tekanu, Aita, Sivavi na Pit Pit Wara bris tu em ol i putim kolta.

Hai Komisina bilong Australia long PNG, Deborah Stokes, i tok, pinisim bilong dispela projek bai sapatim Bogenvil long strongim iekonomi bilong en.

“Infrastraksa bilong transpot em i as tru bilong sosol na iekonomik developmen na ol dispela bai kamapim sefti na gutpela rot netwok long Bogenvil,” Mis Stokes i tok.

Gutpela rot olsem bai helpim ol asples lain long wokim moa bisnis.

Bertha Lorenz, mama bilong Rising Sun Geshaus long Arawa, i tokaut long sampela gutpela samting we bai helpim bisnis bilong em olsem.

“Gutpela rot i mekim raun bilong ol ges bilong mi kamap gutpela. Em i daunim taim bilong travel na tu kos i daun moa. Taim rot i no bin kamap gut, ol kar i save lusim planti mani long ran long rot,” Mis Lorenzo i tok.

I gat sampela moa projek bilong stretim ol bikipela rot long Bogenvil bai kamap long yia 2015 na 2016, wanpela bilong ole m long wok bilong Arawa i go Rigu Bris klostu long bikipela bris bilong solwara long Kieta na sampela rot bilong Buin taun.

## PNG ken groim rais



Wanpela man i sindaun arere long rais pedi long Amadi-Baga, Gabadi, Sentral Provins.

RAIS i nau wok long kamap namba wan kaikai bilong planti manmeri long kantri. Tasol planti manmeri insait long PNG i save tingting olsem graun bilong yumi hia long PNG ino inap long groim rais.

Bipo yet planti bilong yumi i save ting rais em i save groa long ples bilong waitman tasol. Dispela tingting i noken stap wantaim yumi moa bikos PNG nau i ken groim rais.

Gavman bilong Jepan aninit long JICA i wok long halivim ol liklik rurel fama long Manus, Sepik, Milen Be, na Madang long planim rais.

Bosman bilong JICA, Shigeru Sugiyama i bin tok JICA i wok long halivim ol manmeri long PNG long planim rais.

Long Madang, Ramu Niko i wok long halivim ol manmeri bilong Astrolabe be na ol arapela ples long Kurumbukari tu.

Ol ripot Wantok Niuspepa i kisim i soim olsem Ramu Niko ui

wok long halivim ol manmeri long ples long planim rais na kisim long gaden bilong ol yet long kukim na kaikai.

Dispela em i wanpela we long sevim mani na halivim famili long kamapim gutpela sindaun.

Insait long Sentral Provins, Trukai Industris i nau planim rais long Amadi-Baga, Gabadi. Trukai i bin planim rais long fopela hekta na rais i bin groa gut stret.

Dispela i soim olsem PNG i ken groim rais na salim i go long ol arapela kantri we ol i no save planim rais.

Minista bilong Egrikalsa Tommy Tomscoll i bin kamapim wanpela nesene rais polisi long kirapim rais industri long PNG.

Dispela polisi em i stap pinis tasol gavman i mas luksave long kirapim rais indstri long kantri. Rais i ken kamapim planti gutpela samting long kantri sapos gavman i luksave gut long ol liklik manmeri husat i gat bikipela intres tru long planim rais.



Rot bung bilong Morgan Rot bung, klostu long Arawa, Sentral Bogenvil. Foto: Australia Hai Komisen Media yunit.





# Raikos Sekenderi sumatin harim DSTP aweanes

**MOA long 2,000 sumatin na ol tisa long Raikos Sekenderi Skul long Raikos distrik long Madang provins i bin harim ol gutpela skul toktok long rot bilong dip si teilings plesmen (DSTP).**

DSTP em rot o system we Ramu NiCo Menesmen (MCC) i save rausim ol pipia bilong en i go insait long solwara long Basamuk Be insait long Raikos distrik long Madang provins.

DSTP em i no nupela rot long rausim pipia. Ol arapela kampani long PNG long Lihir na Simberi long Nu Ailan provins i save yusim dispela rot long rausim pipia bilong ol i go insait long solwara.

Dispela namba wan aweanes long dispela ruel skul long Raikos em Ramu NiCo Helt, Sefti na Envairomen (HSE) i karimaut namba wan taim stret wantaim sapot bilong Komyniti Afes dipatmen wok lain bilong kampani.

Ripot i kam long Ramu NiCo HSE tim i tok olsem dispela aweanes i karamapim wanem ol samting i save kamap long ol pipia pastaim long ol i yusim DSTP. Ol sumatin i bin gat sans tu long askim ol kwesten long sait long ol simuk we i go aut long ol bikpela paip we i sanap long Basamuk Rifaineri, we ol HSE opisa i bekim.

Planti ol sumatin i soim intares na askim ol kwesten na givim taim long ol HSE opisa i givim toktok. Ol i tok kliia long ol sumatin long rot we kampani i save kisim graun long Kurumbukari Main antap long Usinobundi na bihain ol graun we ol i stretim pinis i save ron olsem slari o graun malumalu bihainim 135 kilomita paip plain i go daun long Basamuk Rifaineri.

Dispela aweanes i karamapim tu sait long menesmen na monitoring o lukautim ron bilong sliari na wanem samting i save kamap long leboratori o ples we ol i save glasim ol kemikol o marasin, na ol system long mekim ol pipia i go orait long ol i tromoi i go daun long solwara.

Ol lain HSE opisa bilong Ramu NiCo i tokaut long ol sumatin na tisa long Raikos Sekenderi olsem dispela DSTP aweanes i bihainim Nesanel Kot Oda bilong Julai 26, 2011 we i tokim developa em Ramu NiCo, PNG Gavman na Madang provinsal gavman long karimaut ol aweanes long olgeta wan wan kwata insait long yia long givim toksave i go long ol lain manmeri long ples na ol stekholdas.

Deputi Siaman bilong Basamuk Lenona Asos-esin, Mista Woi Gore, husat i bin stap harim dispela aweanes i amamas long wanem ol toktok ol HSE opisa i givim long sait long DSTP, na em i tok em bai sapotim ol long kamapim moa kain aweanes long ol viles na hauslain long Raikos na tu ol arapela stekhola.

Dipatmen ov Envairomen na Konsevesen (DEC) na Mineral Risoses Atoriti (MRA) i bin makim Nesanel Gavman na tu Madang provinsal gavman i bin stap long ol namba wan aweanes we i bin kamap long 2014 long ol ples arere long Basamuk eria.

Dispela aweanes long Raikos Sekenderi em long givim gutpela tingting na skul long ol sumatin long save moa long ol infomesen we pas wantaim DSTP. Taim dispela i kamap ol i ken givim stret-pela infomesen i go long ol lain blong ol long ples na tu ol famili bilong ol.

Bikpela awenes em i sanap olsem DSTP o ol pipia Ramu NiCo i trumai i go ananit long solwara i no kamapim wanpela birua long solwara long stat ikam inap tete na bai seif oltaim long bihain.



Masin we I save sekim DSTP paip insait long solwara.



Ol wankain kain awareness long DSTP na Ramu NiCo Projek I save kamap long Divain Wod Univesiti.



Ol sumatin bilong Raikos Sekenderi i putim yau gut stret long DSTP aweanes.



**Ramu NiCo Management (MCC) Ltd,**  
 the manager of Ramu NiCo Project is proud to host the 5th  
**NATIONAL MINING EMERGENCY RESPONSE CHALLENGE**  
 in Madang

Date: August 22-25, 2015  
 Venue: DWU & PNG Maritime College







**WOKABOUT LONG STAIL:**

Klosing seremoni i bin lukim ol etlit i wokabaut i kam insait wantaim stail na ol pleg bilong ol. Hia yumi lukim long Poto 1 i soim **HIRO** na top pilaia na swima bilong PNG em Ryan Pini i wokabaut long franlain na go pas long Tim PNG. Poto 2: **VAHINE TAHITI**: Ol meri Tahiti i stailim na amamas olsem pilai i go gut na pinis na dispela amamas nait bilong olgeta tim. Poto 3 i soim ol **BULA** Tim Fiji lain i wokabaut i kam insait long Sir John Guise Stadium. *Ol Poto: Nicky Bernard*



# PNG i go pas long winim ol gol medol

**Liam Morgan long Main Press Centre long Pot Mosbi i raitim**

PNG i bin pinis top long winim ol Pasifik gem medol long namba tu taim long histori bilong Gems taim ol etlit i bin wokim gut na kisim ol medol long laspela de bilong 2015 Pasifik Gems long Mosbi long las wik Sarere.

PNG i bin winim 6-pela boksing taitel, golp we ol PNG etlit i winim 4-pela gol long golp, kisim tupela moa long bis volibal na tu, long hap marathon bilong ol man.

Host kantri PNG i bin kisim 87 gol medol winim namba tup les kantri Nu Kaledonia i bin kisim 55 gol medol na namba tri kantri em Tahiti we i bin kisim 38 gol medol. Laspela taim PNG i bin kamap top em long 1991

taim Pasifik Gems i bin kamap long Mosbi na PNG i bin winim 44 gol medol.

Long 5-pela Pasifik Gems, Nu Kaledonia i bin kam top. Long laspela gems i bin kamap long Noumea, Nu Kaledonia i bin winim 120 gol medol.

De i bin stat gut taim Kipsy Busamo i bin pinisim haf marathon ran long wanpela awa, 14 minit na 11 seken long winim gol long marathon ran bilong ol man. Em i bin winim Georges Richmond bilong Tahiti na Avikash Lal bilong Fiji.

Long resis ran bilong ol meri, Sharon Firisua bilong Solomon Ailan i bin kisim gol long haf marathon ran long kamap mama bilong 5,000 mita na 10,000mita we em i bin winim pastaim long

wik. Dispela laspela de i bin lukim strongpela eksen pilai taim ol tim na wan wan pilaia i bin laik winim ol medol long ol wan wan kantri bilong ol.

Soti Dinki i bin winim William Howard bilong Kuk Ailan long pilai bilong ol man na kisim gol taim Howard bilong Kuk Ailan i kisim silva na defending sempion bilong Nu Kaledonia, Adrian Peres i bin kisim brons medol.

PNG i bin taitim bun na pilai strong na winim ol gol medol bilong Golp long dispela laspela de.

Kristine Seko i bin go pas long winim gol medol long pilai bilong ol meri taim Elmay Viking bilong Kuk Ailan i winim silva na Arianne Klotz bilong Nu Kaledonia i bin kamap namba tri na winim brons.



# Taurama Akwatik Senta i bin lukim ol eksen pilai

## ...Volibal, taekwando na ol narapela

TAURAMA Akwatik Senta i bin lukim ol eksen volibal pilai long namba tu wik bilong Pasifik gems we i bin mekim ol ol sapota na lain i lukim pilai i amamas olsem ol i tromoim mani long lukim ol gutpela pilai taim ol tim bilong ol wan wan kantri i testim strong na soim stail pilai bilong ol.

Ol strongpela volibal tim em Tahiti, Nu kaledonia, Fiji, PNG, Ameriken Samoa tasol Walis na Futuna i bin soim ol i top pilaia tim.

Stadium i bin pulap gut stret na ol sapota i no isi long strongim ol feveret tim bilong ol

inap pilai i bin pinis long Sarere moning.s

Long wankain taim, taekwando i bin kamap olsem wanpela famili pilai taim ol man pilaia bilong Australia i bin winim 5-pela long 8-pela gol long taekwando.

Safwan Khalil husat i bin win long 2012 Olimpik i winim i bin winim Teddy Teng bilong Tahiti long kisim anda 58 kilogram taitel.

Tambu bilong em, Jack Marton i bin winim Peter Babka, bilong Tahiti long anda 74kg klas na pait i bin pinis 13-0, 20 sekon long namba tu raun..

Meri bilong Khalil em Carmen Marton na tambu meri bilong em, Caroline Martoni bin winim tupela long 4-pela gol medol long dispela pilai bilong ol meri. Long anda 53kg na anda 62kg level.

Maxemillion Kassaman bilong PNG na Johan Hardel bilong Nu Kaledonia i bin winim anda 58kg brons medol taim fevered Jonathan Paschalis na Nelson Tabaua bilong Kiribati i bin resis long anda 74kg pilai.

Ol pilaia bai malolo na wetim 2019 namba 16 Pasifik Gems bai kamap long Nukualofa long Kingdom bilong Tonga.





Tripela wansolwara wantok bilong Solomon Ailan i kam pilai long Pasifik Gems: Lephani to Raithan; Eva Gali (Swim resis), Rocky Ramo (Pawa lifting) na Rose Tadoi (Swim). Ol tripela I no winim resis tasol ol i amamas tru long stap long gems long Pot Mosbi na dispela poto em ol i sanap ausait long Taurama Aquatic Centre.

Poto: Frieda Sila Kana

## Luksave awot long ol top pilaia na opisel

2015 Pasifik Gems i bin lukim ol top pilaia olsem ol wan wan lain, tim, top edministreta na opisel i kisim ol luksave spot awot long klosing seremoni nait long las Sarere.

Lista i go olsem:

- Meri pilaia i bin wokim gut stret long dispela gem em swima, Lara Grangeon, bilong Nu Kaledonia;
- Man pilaia i bin wokim gut stret em biknem na top swima bilong PNG, Ryan Pini;
- Junia man pilaia i bin

wokim gut stret em junia etlit na swima bilong Nu Kaledonia, Thibault Mary;

• Junia meri etlit i bin wokim gut stret em swima bilong Nu Kaledonia, Emma Terebo;

• Tim i bin wokim gut stret em basketbal tim bilong Guam;

• Top spot edministreta em, Richard Kassman, Chef de Mission, Tim PNG;

• Top kosa em Jerry Wallwork, bilong weilifting, Tim, Samoa; na

• Top teknikel opisa em Christophe Bonbon, bilong Nu Kaledonia long basketbal.



## Olgeta bai kisim mani: O'Neill

I kam long bek pes...

Gavman i tokaut olsem em i putim K5 milien long baim ol medal wina, K20,000 long wanwan gol medal wina, K10,000 long wanwan silva na K5,000 long wanwan brons. Biknem man bilong swim Ryan Pini bai kisim K150, 000 long winim 7-pela gol na wanpela silva na Pasifik sprin Kwin Toea Wisl bai kisim K90, 000 long winim 4-pela gol na wanpela silva.

Papua Niugini kisim 88 gol, 69 silva na 60 brons na kamap namba wanples wantaim 217 totol medal tali long pinis bilong Pasifik Gems long Julai 18. Em i moa long K2.7

milien.

Sapos gavman i givim K20,000 long wanwan pilaia long tim gems olsem soka, ragbi na volibal na givim K2,500 long wanwan husat i no winim wanpela medal bai em i givim moa long K7milien.

Praim Minista O'Neill i tok dispela amamas mani bilong givim long ol etlit bilong 2015 em Nesenel Eksektiv Kaunsil bin tok orait bihain long kisim olgeta infomesen bilong ol wanwan tim na em i stap long baset.

Mista O'Neill i tok planti toktok i kamap long daunim gutpela wok gavman i mekim long putim sampela

mani long helpim ol etlit tasol em ol toktok nating na gavman bilong PNG i givim dispela mani long ol etlit long soim amamas long ol sekrefais ol i mekim long pilai na apim nem bilong kantri.

Tim PNG, etlit, opisal na ol sapota i bung gen long Mande nait long Sir Hubert Murray Stadium na selebretim win long 5 kilok apinin i go long 9 kilok nait.

Praim Minista Peter O'Neill, Minista bilong Sports na Pasifik Gems Justin Tkatchenko na Gavana bilong NCD Powes Parkop i kamap long hap long selebretim wanataim

ol na givim mani long ol etlit.

Praim Minista Peter O'Neill na Mista Tkatchenko i lusim ol bihain tasol long mekim liklik toktok long tupela bai malaolo na redi long palamen siting long Trinde.

Gavana Parkop i stap wantaim ol etlit inap long ol i pinis long 9 kilok nait.

Ol biknem atis i pailai laip ben na sapota i joinim Tim PNG na kukim danis long Hubert Mari Stadium.

Ol sapota i no sot win long sapot long tupela wik bilong pilai na long Mande nait i lukim tri-pela kona bilong fil i pulap.



# Medol Tali long 2015 Pasifik Gems-Pot Mosbi-PNG

Mak	Kantri	Gol	Silva	Brons	Total
	Papua New Guinea	88	69	60	217
	New Caledonia	59	50	56	165
	Tahiti	39	34	40	113
	Fiji	33	44	37	114
	Samoa	17	23	11	51
	Australia	17	19	11	47
	Nauru	7	10	5	22
	Solomon Islands	7	6	15	28
	Tonga	7	1	9	17
	Cook Islands	6	7	16	29
	Guam	3	3	7	13
	Kiribati	3	1	5	9
	American Samoa	3	1	4	8
	Federated States of Micronesia	3	1	0	4
	Vanuatu	2	8	12	22
	Norfolk Island	2	3	2	7
	New Zealand	1	9	10	20
	Wallis and Futuna	1	1	6	8
	Tuvalu	1	0	3	4
	Niue	0	1	1	2
	Palau	0	1	1	2
	Marshall Islands	0	0	5	5
	Northern Mariana Islands	0	0	0	0
	Tokelau	0	0	0	0





Hunters mas stap long trek taim gol i lukluk long ol.15-pela man skwad husat i kam long PNG Hunters Klub i pilai tenpela gem na stap long win tasol long Kwinsland i soim olsem nogat arapela tim bai stopim ol long taim ol i pilai long Pasifik Gem Ragbi Nains i kisim gol las wik i go pinis. Ol tim bilong Tonga, Solomon Ailan, Cook Ailan, Samoa na Fiji i hat tru long brukim Tim PNG. Ol trai i go olsem wara. Poto long raithan i soim bikpela sapot bilong PNG.



Matt Giteau i raus long Wallaby Ragbi Sempionsip Tes egensim Ajentina. Matt Giteau i go bek long lain-ap bilong Wallaby i bai stop i kiklik taim bikos em i gat wanpela bagarap long bun bilong em. Em i no inap long pilai long gem egensim Ajentina.

Dane Gagai i go long haus sik taim tim bilong em i pilai yet egensim ol Titans. Senta bilong Newcastle Knights, Dane Gagai, i go long haus sik taim em i bin pilim lewa bilong em i no wok gut, Knights i bin kam bihain long leta wantaim 30-2 win egensim Titans.

BIKNEM Sefa o pilai long ol bikpela wev long solwara bilong Australia, Mick Fanning, i stap orait bihain long sak i laik kaikai em long J-Be Open Wo Sef Lif resis long Saut Afrika. Hariap tru em i lukim wanpela sak i swim i kam klostu long fainel bilong em egensim sefa bilong Australia, Juliam Wilson long Jeffreys Be, long is bilong Port Elizabeth. Piksa i soim Fanning, namba foa long wol na wol sempion insait long tripela taim i paitim na kikim na rausim sak taim em i brukim rop long lek bilong em.


### Specials from the 1<sup>st</sup> July to 31<sup>st</sup> August 2015

SECTORS	ONE WAY INCL TAXES	RETURN INCL TAXES
Daru - Port Moresby	585.41	1,123.08
Kiunga - Port Moresby	775.81	1,481.48
Lihir - Port Moresby	899.11	1,716.28
Losuia - Port Moresby	633.46	1,212.36
Mendi - Port Moresby	668.71	1,279.88
Popondetta - Port Moresby	346.56	673.48
Tari - Port Moresby	887.16	1,691.08
Wapenamanda - Port Moresby	606.66	1,163.08
Tabubil - Port Moresby	880.56	1,677.48
Kiunga - Mt Hagen	692.51	1,324.68
Lihir - Rabaul	316.86	620.28
Mt Hagen - Lae	502.11	966.28
Rabaul - Hoskins	370.21	721.88

\* Taxes included



Reservations - Toll Free: 1805465  
Email: [sales.linkpng@airniugini.com.pg](mailto:sales.linkpng@airniugini.com.pg)  
Find us on Facebook: [www.facebook.com/linkpng](http://www.facebook.com/linkpng)



Ol Roosters i les long stap long wari taim Shaun Kenny-Dowall i lusim ol bihain ol i winim Warriors wantaim 24-0 long Sidney Futbol graun long Sande apinun. Kenny-Dowall i lusim gem taim Nu Silan intanesenel i tok em i save pait long haus o domestik vailens. Kosa bilong Roosters, Trent Robinson, i no klia long amamas taim o no gat long nius olsem Kenny-Dowall bai stap ausait, tasol em tok bai ol i go het long sapatim em long kot.





# Las spot eksen poto bilong XV Pasifik Gems


Ol poto: Nicky Bernard



Tim PNG Hoki bilong ol man na meri. Ol meri i winim Silva medol na ol man i winim Brons medol.



Tupela meri Vanuatu i winim Silva medol bilong Bis Voilbal.



Longpela disten swima bilong PNG Seldon Plummer.



Antap: PNG em sempion bilong bis volibal bilong ol man. Ol winim Gol medol taim ol pilai wantaim Fiji.

Tim Fiji hoki bilong ol man na meri ol winim Gol medol.

## Port Moresby to LOSUIA

Buy one Y class POM to Losuia and pay for the next 3 at **15% DISCOUNT!**

You also get a **27% discount** on rooms at Lokuia Lodge which includes meals.



[www.facebook.com/linkpng](http://www.facebook.com/linkpng)

*Where would you rather be?*


Offer ends July 31st, 2015



\*TERMS & CONDITIONS APPLY  
Book online at [www.airniugini.com.pg](http://www.airniugini.com.pg)

Call Toll Free: 180 5465 or email: [sales.linkpng@airniugini.com.pg](mailto:sales.linkpng@airniugini.com.pg) / [tours@airniugini.com.pg](mailto:tours@airniugini.com.pg)





**IMPROVED TASTE!** Niupela teist wantaim planti mit na oil. Teistim na bai yu laikim moa yet.

# DIANA

Tuna



Emi tuna  
bilong PNG



Manufactured by:



RD Tuna Canners Ltd.

Moa mit na  
oil insait



TUNA IN OIL

Wol spot na NRL poto insait long pes 26..



# Olgeta bai kism mani: O'Neill

Stanley Nondol  
i raitim

GAVMAN bilong Papua Niugini bai baim olgeta spotman na meri husat i pilai long 2015 Pasifik Gems maski ol i winim wanpela medal o nogat.

Praim Minista Peter O'Neill i tok ol etlit husat i no winim wanpela medol (gol, brons, silver) bai kism K2, 500. Dispela nau bai lukim olgeta etlit bai kism mani long PNG gavman.

Praim Minista O'Neill taim em i mekim dispela tokaut long ol etlit na ol pipel bilong kantri long ol i mas bilip long ol yet olsem ol i ken mekim kainkain samting na kamapim biknem long wol.

"Mi Papua Niugini man mi amamas wankain olsem ol pipel i amamas long ol etlit bilong yumi. I no olgeta bai win tasol long makim maus bilong ol pipel mi tokaut olsem olgeta etlit bai yupela kism sampela liklik mani long soim olsem mipela amamas long yupela apim nem bilong yumi olgeta" O'Neill i tok.

*I go moa long pes 25*

Golden gel- Toea Wisil wantaim brata bilong em Kupun i sanap wantaim gavana bilong NCD long taim bilong selebresen bilong Tim PNG long Sir Hubert Murray Stadium long Kone, Pot Mosbi. Kupun i tok em i lusim etletik bihain long em i winim wanpela silva na wanpela gol long 2015 Pasifik Gems. Foto: Nicky Bernard.

# Senisim long Sensi

## Next time you change your baby, change to Sensi Diapers.

*Good Products, Better Prices, ikam long*

### Johnstons Pharmacies Ltd

P.O.Box 1066, Boroko, Papua New Guinea.

Tel +675 325 3185 Fax +675 325 0190 Email sales@johnstons.com.pg

